

補正水經序

金禮部郎中蔡正甫作補正水經三卷翰林應奉蘇君伯修購得其書將版行之屬余序其篇端案隋經籍志有兩水經一本三卷郭璞注一本四十卷酈善長注善長即道元也然皆不著撰人姓名唐杜佑作通典時尚見兩書言郭璞疎略於酈注無所言撰人則槩未之考也舊唐志始云郭璞作宋崇文總目亦不言撰人爲誰但云酈注四十卷亡其五然未知兩水經之一在一亡一見於斯時否也新唐志乃謂漢桑欽作水經一云郭璞作今人言桑欽者本此也崇文總目作於宋景佑與新志書同時又未知新志何所據以爲說也余嘗參訂

之說者疑欽爲東漢順帝以後人以疑一縣疑之也今
經言江水東逕永安宮南永安宮昭烈託孤於孔明之
北也今特著於斯又若因其人而重者得非蜀漢間人
所爲也不寧惟是也其言北縣名多曹氏置南縣名多
孫氏置余又未暇一二數也斯則近代宇文氏以爲經
傳相淆者此說近之也然必作經作傳之人定而後可
分也或者又曰豈非欽作於前二氏附益於其後他書
或然也而此未必也西漢儒林傳言塗暉授河南桑欽
君長尚書晁氏言欽成帝時人使古有兩桑欽則可審
爲成帝時欽則是書不當見遺於漢藝文志也抑余又
有疑於斯水經述作往往見於南北分裂之時借曰舊

唐志可據則作者南人注者北人在當時皆有此疆彼界之殊又焉知其詳略異同不限於一時聞見之所逮也嗟夫古今有志之士思皇極之不足傷同風之無時又焉知其不寓深意於是書也然則景純也道元也正甫也是或一道也然以余觀正甫之博洽多識其見於他著作者蓋有劉原父鄭漁仲之風中州士之巨擘也是書雖因宇文氏之感發而有以正蜀版遷就之失其詳於趙代間水此固景純之所難若江自潯陽以北吳公以東則又能使道元之無遺恨者也伯修生車書混一之代身為史官年學俱富於今人放失舊聞多所攬攬而是言又有關於職方之大者故余亦願附著其

焉而不自知其妄也歐陽玄

正甫書惜不見得圭齋此序經注之源流了然矣是
篇載元文類中附錄之以便讀者

原序

敘曰水之爲德大矣哉道生天一職統材五發始西極
產母隅也折赴東墟趨子方也濺涌昭化妙之初質流
瀾符於穆之神用厚氣肇之升盛露雨由之感澤象曜
資之光朗玄黃本之浮載穹瀨倚之配密雲漢會之紀
戒圖書託之興瑞祇軸寄之融絡是以寓目者歎其渾
逝臨淵者頌其靈長且兆類非此無以胚阜萬里非此
無以準平醴饗非此無以烹繕而育年壤壚非此無以
灌溉而興穀法其形勢而樹都廟因其限隔而分州域
軸轡興而窮遐互通堤鑿成而埆瘠咸利鍾匯之區則
珠玉以登枯絕之野則林壑不毛函夏泰和則皇波達

貫坦乎國紀封原割畫則百川斷裂洋然險防况其精
通天步體轄人事海安而知內寧河清而期聖出徒焉
卜廢竭以表亡則代運之隆衰而姓庶之災吉亦可觀
也但卑赴其常淩疏爲順平成之績粲在夏書其宣導
也必揆夫源首其排入也必極夫歸納以奠以敷號名
俱炳厥後九丘不傳四岳薶緼周官存敷浸之略爾雅
開崑崙之端若司馬遷之載河渠庾仲雍之筆江記偏
係一方匪兼八表况王澤寢消地象俱廢樂廣闢者溷
其溝洫僂私謀者壅其湍泉公家醜激巨右改張是以
啓塞靡恒陵谷皆變洪鉅者失其包帶微纖者亂其營
緯紜紜訕莫之質竟也已故漢之桑欽特創此作追

法貢體錄爲新經羅併四際總勒一典凡所引天下之水百三十有七苟非經流不在記注之限錯陳舊纂以備叅鈎派盡條科以罄脈衍務討異奇同蔚宗之旨趣嚴標郡縣肖班固之鋪設是乃曠絕之觚翰也然規網則舉解節未彰迨於後魏酈道元因景純之濫觴足君長之簡逸以博洽之弘襟擅圖輿之顛學隨經扞述掇籍弘鋪剖說十倍於前文揮述半陟其躬履或衆援以明譌或極辨而較是或哀述以昭邇或廓無而續有故凡過歷之臯維夾竝之坻岸環間之亭郵跨俯之城陸鎮被之巖嶺迴注之谿谷瀕枕之鄉聚聳映之臺館建樹之碑碣沈淪之基落靡不芻萃曲收左撫右采豈曰

桑欽之詁釋實所以粉飾漏闕銓次疆隅乃相濟而爲
編者也省曾又覽古山海經十八卷亦字中之通撰也
一則主於敘山而水歸詳綴一則專於紀水而山頗寓
列蓋山者水之根底水者山之委枝故談伊洛者必連
熊外語漆沮者遂及荆岐亦自然之偶屬而不可判離
者也故併合以傳庶好古之賢無稗輯之煩勤爾客謂
二經所記於今矛盾矣其將舍旃可乎予解之曰子何
榆枋之安而螻蛄之拘也其伯益之覽疏猶之炎農之
辨味也桑酈之括纂猶之妣禹之告成也今卉藥非簠
簋之稽案咸賦豈驕華之志掌亦將擯本艸以詭誕斥
禹貢之遠闊可乎况山殊稱目而盤峙之形不眩焉水

異分合而就下之情不惑焉粵遡往牒則遠方圖物夏
鼎之鑄魚之聶耳雕題湯令之備獻也白民黑齒成王
之作會也出受八千管仲之蒐揚也殘遺秦柱蕭何之
顯布也獵廣窮長王充之嗜信也以至孔疏據之以釋
經漢志錄之而麗史齊澂演之而聚書唐典繫之而建
部守節屢登於正義應麟富戢於地鈔江淹補之而不
能吉甫刪之而頓躓古人崇好文獻足徵苟欲指核希
怪狀寫物靈暘撰荒極理驗遷圯裁量利害差剖離翕
鑿度率眡宅定中外作起民緒咨諏帝采則二經者亦
寰內不刊之珍典也嘉靖甲午三月吳郡黃省曾撰

蓋水經、書黃先生省曾序之詳矣其言閱肆麗爾大

都侈其功用與兩家之宜傳云爾第校讐未精亥豕時
混人非邢邵疇能取適新安太學吳君絕愛此書志存
嘉惠乃延江都陸君至白下假以歲月窮其搜剔於是
梓匠殫技觀者厭心書成陸君以屬世懋為之序曰物
於天地間最鉅而最夥者莫如水其於經紀法界浸漑
萬靈功至矣譬之人身津液精血流貫注伏皆是物也
治身者不循其血脈意醫無所席手治水者不辨其條
紀意匠無所施功詎可無傳述於世令荒度者受成乎
子長號為良史書止河渠蠡測一勺耳後之作者竟無
述焉世所馮依見天地之血脈者桑欽氏一書而已欽
書雖多註漏體嚴詞雅故是作經法也後魏酈道元疏

之旁引百家時發雋語流溼之外贅行紀異博雅之士
倚以爲談然經言不典者已經道元多所刪定今去道
元不能千載而余所覩記源流或盪何也蓋其說有三
焉首楞嚴義云見水身中與浮幢王刹諸香水海等無
差別是知人之一身從少至老其間枯溢流壅種種不
一水行天地間而欲令千載一轍乎自魏迄今詎能無
變此其解一也時代陵谷聚落耗登或名在而邑徙或
地是而名非道元所以著新莽之稱良有意矣今之郡
邑豈盡元氏舊疆即波流不改而名號已殊安所定爲
故都繩其繆指此其解二也河出崑崙傳之載籍尋源
勝國星宿始聞故知身所未經終爲貴耳道元雖稱多

歷未僂徧行魏疆况澤國在南天塹見限安能取信行人之口悉諳未見之都此其解三也然則言在先民鑒
惟來括好古者尚其奧博經世者貴其變通若謂書不足馮則負械之尸彭侯之怪何以見驗於文人若謂書可盡信則禹貢之山川毛詩之鳥獸草木何以頓殊於今日學者會而通之足明是書之足傳矣若乃桑欽立言良史不著其名道元多奇穢史貶過其實譚藝之士以爲遺恨而諸君子能爲表章羽翼傳之通邑大都足使千載而上靈鬼骨香千載而下文人氣吐詎非方輿之珍覽寰宇之一快乎吳君名瑄陸君名弼皆一時嫻於文詞人也萬曆乙酉瑯琊王世懋撰

在昔志地者禹貢而下代有撰述迄於齊梁至二百四
十四家陸常侍澄任太常昉先後集爲一部名地理書
極稱該博隋唐之際圖史散失陸任所纂已不可得而
別集自行者猶五十餘家乃今所傳僅山海佛國十洲
神異數種而已然而奇編奧記往往散見水經注中造
語命詞殊爲彪炳則知水經一注擷彼二百四十四家
菁英居多豈不誠爲六朝異書哉顧傳寫既久錯簡譌
字交棘口脗至不可讀余甚病焉間嘗紬繹割正十之
六七已與友人綏安謝耳伯夔源孫無撓商權校讐十
得八九則懼古今聞見互有異同未敢輕致雌黃也乃
援引載籍以爲左券名曰水經注箋篋而藏之萬曆甲

寅齊安李公分陝江右既及奏最政教恢卓風化穆清
甘棠之頌洋溢郡國間於退食之暇延見紳帶表章幽
微一日詢古先逸典於太學生李嗣宗嗣宗偶以不佞
水經注箋對公遽索觀之慨然嘆曰是書脫誤可憾幾
欲淪廢乃今箋校精詳殆還鄴氏舊物可無與當世好
古之士共覩乎遂損鏤梓之仍屬嗣宗董校其事極深
研幾閱五月而告成嗟乎水經一書原本山川而作非
有道業名理可味也又非當世博士家言所急也李公
一見輒命梓之豈無槩於中哉夫水在天地間猶乎世
之貨財也發源名山流成江河趨為四海蘊為雲氣還
雨天下以浸潤萬物未嘗少壅也一有所壅即至泛溢

昏墊患被四方猶之高府之財瓊林大盈之藏蓄而不
散納而不出理極勢窮潰決雷駭此則不覩川壅而潰
之既也有國有家者使能因是水經之理引申觸類以
施於政何患不地平而天成乎然則公之刻此用意蓋
深遠矣非規規小識所能測度矣萬曆乙卯孟夏朔日
南州朱謀瑋撰

水經在楊用修時以爲久湮搜刻方始而去其注近方
有吳歙二刻并注盛行於世惜其中尚不無譌謬嘗謂
古書一有譌謬便成廢書然在他書譌者猶可以理測
可以意度且一字之譌未必能累篇一篇之譌未必能
累卷惟水經有譌非足跡所履非圖籍所載不敢擅定

且出過注之異勢也江淮河漢之異名也一字之譌
逕派稍異分合頓殊此無以通彼無以受譬之人身脈
絡之間一節有礙即為痿癱故是書校刻之難尤倍他
書南州鬱儀氏專攻此書有年而架帙甚富腹笥屢廣
又與四方博雅之士所得於遐搜逸覽者互相參糾漸
歸於是遂成此書忠臣李生克家佐有勞勩一日持以
相過余往讀是書每遇疑處不能自通輒為寘卷今得
聞所未聞喜而刊之于署因嘆古人著書立言皆於古
無所沿於人無所倚或窮天文陰陽之變或索輿地廣
闊之形或藉之名山大川或馮之耳目手足或闢千古
特立之見或創從來未有之書故終其身著一家言以

成名而今人載籍滿目勘訂甚易乃不能為古人保已
成之緒則何古今人之不相及也世界有四大水居其
一然古今至變者亦莫如水乃有疑是書與今水不無
相迤者不知此適以明其變耳又有疑桑欽於史較其
名者夫司馬遷之傳以史記也至於漢書一傳不過寫
其自序文耳何足重遷班固之傳以漢書也亦不以范
曄後漢書之一傳重也欽以水經傳奚必以史重於經
邪又有謂酈注太贅者經固宜簡注固宜煩經宜據實
以書注宜旁引以證彼疑其任傳而疑經者不曰郭之
注劉之注裴之注非注也各自為一書以行也何獨疑
於酈乎以其鉤採羣書弘鋪抒述新益見聞尚慮是書

之易竟矣。今注箋一出而變者可定，黜者可信，博者可
該，疑者可證。是經之功不在禹下，而箋校之功亦不在
欽下矣。李生謂是書成當一序之余，笑曰：水經無容序
也。水經而贅之以序，猶序書經而贊其政事之嘉，序詩
經而稱其風雅之致，也不幾於燭火而助日月之光乎？
古今序水經者皆複語也，可無序也。惟序其所以箋校
水經者如此，其諸君子之姓名則俱載編首之下。萬曆
乙卯夏四月朔日西楚李長庚撰。

北史本傳

酈範字世則范陽涿鹿人也祖紹慕容寶濮陽太守以郡迎降道武授兗州監軍父嵩天水太守範太武時給事東宮太武踐阼追錄先朝舊勳賜爵永寧男以奉禮郎奉遷太武景穆神主於太廟進爵為子為征南大將軍慕容白曜司馬又定三齊範多進策白曜皆用其謀遂表為青州刺史進爵為侯加冠軍將軍還為尚書右丞後除平東將軍青州刺史假范陽公範前解州還京也夜夢陰毛拂踝他日說之時人有占夢者史武進云公豪盛於齊下矣使君臨撫東秦道光海岱必當重牧全齊再祿營丘矣範笑答曰吾將為卿必驗此夢後果

如言時鎮將元伊利表範與外賊交通孝文詔範曰鎮將伊利表卿造船市玉與外賊交通規陷卿罪窺覲州任有司推驗虛實自顯有罪者今伏其辜矣卿其明爲算略勿復懷疑還朝卒京師謚曰穆子道元

道元字善長初襲爵永寧侯例降爲伯御史中尉李彪以道元執法清刻自太傅掾引爲書侍御史彪爲僕射李沖所奏道元以屬官坐免景明中爲冀州鎮東府長史刺史于勁順皇后父也西討關中亦不至州道元行事三年爲政嚴酷吏人畏之姦盜逃於他境後試守魯陽郡道元表立黌序崇勸學教詔曰魯陽本以蠻人不立大學今可聽之以成良守文翁之化道元在郡山蠻

伏其威名不敢爲寇延昌中爲東荊州刺史威猛爲政
如在冀州蠻人詣闕訟其刻峻請前刺史寇祖禮及以
遣戍兵七十人送道元還京二人竝坐免官後爲河南
尹明帝以沃野懷朔薄骨律武川撫冥柔玄懷荒禦夸
諸鎮竝改爲州其郡縣戍名令準古城邑詔道元持節
兼黃門侍郎馳驛與大都督李崇籌宜等立裁減法會
諸鎮叛不果而還孝昌初梁遣將揚州刺史元法僧又
於彭城反叛詔道元持節兼侍中攝行臺尚書節度諸
軍依僕射李平故事軍至渦陽敗退道元追討多有斬
獲後除御史中尉道元素有嚴猛之稱權豪始頗憚之
而不能有所糾正望愛損司州牧汝南王悅嬖近左右

丘念常與臥起及選州官多由於念念常匿悅第時還其家道元密訪知收念付獄悅啓靈太后請全念身有勅赦之道元遂盡其命因以劾悅時雍州刺史蕭寶夤反狀稍露侍中城陽王徽素忌道元因諷朝廷遣爲關右大使寶夤慮道元圖已遣其行臺郎中郭子帙圍道元於陰盤驛亭亭在岡上常食岡下之井旣被圍穿井十餘丈不得水水盡力屈賊遂踰牆而入道元與其弟道闕二子俱被害道元瞋目叱賊厲聲而死寶夤猶遣斂其父子殯於長安城東事平器還贈吏部尚書冀州刺史安定縣男道元好學歷覽奇書撰注水經四十卷本志十三篇又爲七聘及諸文皆行於世然兄弟不能

篤睦又多嫌忌時論薄之子孝友襲道元第四弟道慎
字善季涉歷史傳有幹局位正平太守有能名遷長樂
相卒贈平州刺史道慎弟道約字善禮樸質遲鈍頗愛
琴書性多造請好以榮利干謁乞匄不已多爲人所笑
弄坎壈於世不免飢寒晚歷東萊魯陽二郡太守爲政
清靜吏民安之範弟道峻子暉字幼和好學有文采尤
長吏幹舉秀才射策高第歷位尚書外兵郎行臺長孫
承業引爲行臺郎暉頗兼武用恒以功名自許每進計
於承業多見納用以功賞魏昌縣子暉在軍啓求減身
官爵爲父請贈詔授征虜將軍安州刺史暉後與唐州
刺史崔元珍固守平陽爾朱榮稱兵赴關暉與元珍不

從為榮行臺郎中樊子鵠陷城被害所作文章頗行於
世撰慕容氏書不成子懷則司空長流參軍

水經目錄

卷一

河水一

卷二

河水二

卷三

河水三

卷四

河水四

卷五

河水五

漂水

卷六

汾水

澮水

涑水

文水

原公水

洞渦水

晉水

湛水

卷七

濟水一

卷八

濟水二

卷九

清水

沁水

淇水

蕩水

洹水

卷十

濁漳水

清漳水

卷十一

易水

滹水

卷十二

聖水

巨馬水

卷十三

濕水

卷十四

濕餘水

沽水

鮑丘水

濡水

遼水

小遼水

涿水

卷十五

洛水

卷十六

穀水

甘水

漆水

澆水

沮水

卷十七

渭水上

卷十八

渭水中

卷十九

渭水下

卷二十

漾水

丹水

卷二十一

汝水

卷二十二

潁水

洧水

澗水

澗水

卷二十三

陰溝水

汲水

卷二十四

睢水

匏子水

汶水

卷二十五

泗水

沂水

卷二十六

沭水

巨洋水

淄水

汶水

澁水

膠水

卷二十七

洒水上

卷二十八

洒水中

卷二十九

洒水下

湍水

潛水

粉水

均水

泚水

白水

卷三十

淮水

卷三十一

澧水

涪水

灑水

濯水

灑水

灑水

涓水

卷三十二

涿水

蘄水

洩水

泚水

泚一作

泄水

肥水

施水

沮水

漳水

夏水

羌水

涪水

潼水

涪水

卷三十三

江水上

卷三十四

江水中

卷三十五

江水下

卷三十六

青衣水

洹水

一作
桓

若水

沫水

延江水

沅酉水

存水

溫水

卷三十七

淹水

葉榆水

夸水

油水

澧水

沅水

浪水

卷三十八

資水

連水

湘水

灘水

溱水

卷三十九

匯水

淡水

鍾水

耒水

涿水

漉水

瀏水

澗水

贛水

廬水

卷四十

漸江水

斤江水

水經注目錄終

漢桑欽撰

後魏酈道元注

河水一

崑崙墟在西北

三成爲崑崙丘崑崙說曰崑崙之山三級下曰樊桐

一名板松二曰玄圃一名閻風上曰增城一名天庭

是爲太帝之居廣雅云崑崙墟有三山閻風板桐玄圃淮南子云縣圃涼風樊桐在崑崙

閻闔之中山上有層城九重楚辭云崑崙縣圃其尻安在增城九重其高幾里嵇康遊仙詩云結友家板

桐但未聞板松耳疑或字譌

去嵩高五萬里地之中也

禹本紀與此同高誘稱河出崑崙山伏流地中萬三千

里禹導而通之出積石山按山海經自崑崙至積石
一千七百四十里自積石出隴西郡至洛準地志可
五千餘里又按穆天子傳天子自崑崙山入於宗周
乃里西土之數自宗周瀍水以西北至於河宗之邦
陽紆之山三千有四百里自陽紆西至河首四千里
合七千四百里外國圖又云從大晉國正西七萬里
得崑崙之墟諸仙居之數說不同道阻且長逕記縣
褻疑當作經
記綿邈水陸路殊徑復不同淺見未聞非所詳
究不能不聊述聞見以誌差違也

其高萬一千里

山海經稱方八百里高萬仞郭景純以爲自上二千

五百餘里淮南子稱高萬一千里百一十四步二尺
六寸

河水

春秋說題辭曰河之為言荷也荷精分布懷陰引度也釋名曰河下也隨地下處而通流也考異郵曰河者水之氣四瀆之精也所以流化元命苞曰五行始焉萬物之所由生元氣之媵液也管子曰水者地之血氣筋脈之通流者故曰水其具財也而水最為大水有大小有遠近水出山而流入海者命曰經水引他水入於大水及海者命曰枝水出於地溝流於大水及於海者又命曰川水也莊子曰秋水昔至百川

灌河經流之大孝經援神契曰河者水之伯上應天
漢新論曰四瀆之源河最高而長從高注下水流激
峻故其流急徐幹齊都賦曰川瀆則洪河洋洋發源
崑崙九流分遊玉海引此作遊北朝滄淵驚波沛厲望沫揚
奔風俗通曰江淮河濟為四瀆瀆通也所以通中國
垢濁白虎通曰其德著大故稱瀆釋名曰瀆獨也各
獨出其所而入海

出其東北陬

山海經曰崑崙墟在西北河水出其東北隅爾雅曰
河出崑崙墟色白所渠并千七百一川色黃物理論
曰河色黃者衆川之流蓋濁之也百里一小曲千里

一曲一直矣漢大司馬張仲議曰

按張仲事出梅譚新論而漢書溝洫

志議河濁不宜溉田者乃大司馬史長安張戎字仲功今稱張仲疑誤

河水濁清激一

石水六斗泥而民競引河溉田今河不通利至三月

桃花水至則河淩以其噎不洩也禁民勿復引河是

黃河兼濁河之名矣述征記曰盟津河津恒濁方江

為狹比淮濟為闊寒則冰厚數丈冰始合車馬不敢

過要須狐行云此物善聽冰下無水乃過人見狐行

方渡余按風俗通云里語稱狐欲渡河無如尾何且

狐性多疑故俗有狐疑之說亦未必一如緣生之言

也述征記郭緣生所撰

屈從其東南流入於渤海

山海經曰南即從極之淵也一曰中極之淵深三百
仞唯馮夸都焉括地圖曰馮夸恒乘雲車駕二龍河
水又出於陽紆凌門之山而注於馮逸之山穆天子
傳曰天子西征至陽紆之山河伯馮夸之所都居是
惟河宗氏天子乃沈珪璧禮焉河伯乃與天子披圖
視典以觀天子之寶器玉果璿珠燭銀金膏等物皆
河圖所載河伯以禮穆王視圖方乃導以西邁矣粵
在伏羲受龍馬圖於河八卦是也故命歷序曰河圖
帝王之階圖載江河山川州界之分野後堯壇於河
受龍圖作握河記逮虞舜夏商咸亦受焉李尤盟津
銘洋洋河水朝宗於海徑自中州龍圖所在淮南子

曰昔禹治洪水具禱陽紆蓋於此也高誘以爲陽紆

秦藪非也釋氏西域志曰阿耨達太山其上有大淵

水宮殿樓觀甚大焉山即崑崙山也穆天子傳曰天

子升崑崙封豐隆之葬豐隆雷公也雷電龍

三字即誤

阿耨達宮也其山出六大水山西有大水名新頭河

郭義恭廣志曰甘水也在西域之東名曰新陶水山

在天竺國西水甘故曰甘水有石鹽白如水精火燉

則破而用之康泰曰安息月支天竺至伽那調御皆

仰此鹽釋法顯曰度葱嶺已入北天竺境於此順嶺

西南行十五日其道艱阻崖岸險絕其山唯石壁立

千仞臨之目眩欲進則投足無所下水名新頭河

昔人有鑿石通路施笏梯者凡度七百渡梯已躡縣

緮過河河兩岸相去咸八十步九驛所絕法顯傳作九驛所記

驛當作譯漢之張騫甘英皆不至也班超遣掾甘英窮臨西海備其土風傳其

怪珍余診諸史傳即所謂罽賓之境有盤石之隘道狹

尺餘行者騎步相持緮橋相引二十許里方到縣渡

阻險危害不可勝言郭義恭曰烏耗之西有縣渡之

國山谿不通引繩而渡故國得其名也其人山居佃

於石壁間累石為室民接手而飲所謂援飲也有白

羊小步馬有驢無牛是其縣渡乎釋法顯又言渡河

使到烏菴國烏菴國即是北天竺佛所到國也佛遺

足跡於此其跡長短在人心念至今猶爾及曬衣石

尚在新頭河又西南流屈而東南流逕中天竺國兩

岸平地有國名毗荼佛法興盛又經蒲

法顯傳作捕

那河

河邊左右有二十僧伽藍此水逕流逕摩頭羅國而
下合新頭河自河以西天竺諸國自是以南皆為中
國人民殷富中國者服食與中國同故名之為中國
也泥洹已來聖衆所行威儀法則相承不絕自新頭
河至南天竺國迄於南海四萬里也釋氏西域記

曰新頭河經罽賓犍越摩河刺諸國而入南海是也

阿耨達山西南有水名遙奴山西南小東有水名薩

罕小東有水名恒伽此三水同出一山俱入恒水康

泰扶南傳曰恒水之源乃極西北出崑崙山中有五

大源諸水分流皆由此五大源枝扈黎大江出山西

北流東南注大海枝扈黎即恒水也故釋氏西域志

有恒曲之自恒北有四國最西頭恒曲中者是也有

拘夸那竭國法顯傳曰恒水東南流逕拘夸那竭國

南城北雙樹間有希連禪河佛觀佛三昧經作熙連河佛國記作希連禪河佛

本行經作尼連禪河法顯傳無邊世尊於此北首般

泥洹佛國記作北首般泥洹遠法師不敬王者論云冥神絕境謂之泥洹舊作泥涅誤分舍

利處支僧載外國事曰佛泥洹後天人以新白縹裹

佛以香花供養滿七日盛以金棺送出王宮渡一小

水水名醯蘭那去王宮可三里許在宮北以旃檀木

為薪天人各以火燒薪薪了不爇大迦葉從流沙還

不勝悲號感動天地從是之後他薪不燒而自燄也
王斂舍利用金作斗量得八斛四斗諸國王天龍神
王各得少許齋還本國以造佛寺阿育王起浮屠於
佛泥洹處雙樹及塔今無復有也此樹名娑羅樹其
樹華名娑羅法也此華色白如霜雪香無比也竺枝
芝一作扶南記曰林楊國去金陳國步道二千里車馬
行無水道舉國事佛有一道人命過燒葬燒之數千
東樵故坐火中乃覓著石室中從來六十餘年尸如
故不朽竺枝自見之夫金剛常住是明永存舍利利
刹一作見畢天不朽所謂智空罔窮大覺難測者矣其
水亂流於恒恒水又東逕毘舍離城北釋氏西域志

曰毘舍利維邪離國也支僧載外國事曰維邪離國
去王舍城五千由旬城周員三由旬維詰家在大城
裏宮之南去宮七里許屋宇壞盡惟見處所耳釋法
顯云城北有大林重閣佛住於此本菴婆羅女家施
佛起塔也城之西北三里塔名放弓仗恒水上流有
一國王王小夫人生肉胎大夫入妒之言汝之生不
祥之徵即盛以木函擲恒水中下流有國王遊觀見
水上木函開看見千小兒端正殊特王取養之遂長
大甚勇健所往征伐無不摧伏次欲伐父王本國王
大愁憂小夫人問何故愁憂王曰彼國王有千子勇
健無比欲來伐吾國是以愁爾小夫人言勿愁但於

城東作高樓賊來時置我樓上則我能却之王如是

言賊到小夫人於樓上語賊云汝是我子何故反作

逆事賊曰汝是何人云是我母小夫人曰汝等若不

信者盡張口仰向小夫人即以兩手將乳佛國記作

按大集月藏經云牛穀乳時出乳作五百道俱墜千

子口中賊知是母即放弓仗二父王作是思惟皆得

辟支佛今二塔猶在後世尊成道告諸弟子是我昔

時放弓仗處後人得知於此處立塔故以名焉千小

兒者即賢劫千佛也釋氏西域志曰恒曲中次東有

申迦扇柰揭城也疑作佛下三寶階國也法顯傳曰

恒水東南流逕僧迦施國南佛自忉利天東下三道

寶階爲母說法處寶階既沒阿育王於寶階處作塔

後作石柱柱上作師子象外道少信師子爲吼怖懼

心伏

舊作怖效心誠佛國記云師子乃大鳴吼見證於是外道懼怖心伏而退

恒水又東

逕罽賓饒夸城南南接恒水城之西北六七里恒水

北岸佛爲諸弟子說法處恒水又東南逕沙祇

法顯傳祇

下有

大字國北出沙祇城南門道東佛嚼楊枝刺土中生

長七尺不增不減今猶尚在恒水又東南逕迦維羅

衛城北故曰淨王宮也城東五十里有王園園有池

水夫人入池洗浴出池北岸二十步東向舉手攀樹

生太子太子墮地行七步二龍吐水浴太子遂成井

池衆僧所汲養也太子與難陀等撲象角力射箭入

地今有泉水行旅所資飲也釋氏西域記曰北

宋本
作西

域志城北三里恒水上父王迎佛處作浮圖作佛疑當抱

佛象外國事曰迦維羅越國今無復王也城池荒穢

惟有空處有優婆塞姓釋可二十餘家是昔淨王之

苗裔故爲四姓詳見摩
登伽經住在故城中爲優婆塞故尚

精進猶有古風彼日浮圖壞盡條王彌夏修治一浮

圖私訶條王遊物助成今有十二道人住其中太子

始生昔妙后所攀樹樹名須須字下原缺一字因
果經云樹名無憂即

此樹阿育王以青石作后攀生太子象昔樹無復有

後諸沙門取昔樹栽種之展轉相承到今樹枝如昔

尚蔭石象又太子見行七步足跡今日文理見存阿

育王以青石挾足跡兩邊復以一長青石覆上國人

今日恒以香花供養尚見足七形文理分明今雖有

石覆無異或人復以數重古具鈔本重覆貼著石上

逾更明也太子生時以龍王夾太子左右吐水浴太

子見一龍吐水煥一龍吐水冷遂成二池今尚一冷

一煥矣太子未出家前十日出往王田闍浮樹下坐

樹神以七寶奉太子太子不受於是思惟欲出家也

王田去宮一據據左一據據右晉言十里也太子以

三月十五日夜出家四天王來迎各捧馬足爾昔諸

神天人側塞空中散天香花此時以至河南摩強水

即於此水邊作沙門河南摩強水在迦維羅越北相

去十由旬此水在羅閱祇瓶沙國相去三十由旬菩

薩於是暫過瓶沙王出見菩薩菩薩於瓶沙隨樓那

果園中住一日日暮偃去半達盍愁宿半達晉言白

也盍愁晉言山也白山北去瓶沙國十里明旦偃去

暮宿曇蘭山去白山六由旬於是逕詣貝多樹貝多

樹在貝多閱祇北去曇蘭山二十里太子年二十九

出家三十五得道此言與經異故記所不同

普曜經云菩薩

於樹下坐明星出時豁然大悟年十九出家三十成道竺法維曰迦維國佛所

生天竺國也三千日月萬一作二千天地之中央也

康泰扶南傳曰昔范旃昔有譚楊國人家翔黎嘗從

其本國到天竺展轉流賈至扶南爲旃說天竺土俗

道法流通金寶委積山川饒沃恣其所欲左右大國
世尊重之旃問之今去何時可到幾年可迴黎言天
竺去此可三萬餘里往還可三年踰及行四年方返
以爲天竺之中也恒水又東逕藍莫塔塔邊有池池
中龍守護之阿育王欲破塔作八萬四千塔悟龍王
所供知非世有遂止荒蕪無人羣象以鼻取水灑地
若蒼梧會稽象耕鳥耘矣恒水又東至五河合口蓋
五水所會非所詳矣阿難從摩竭國向毗舍離欲般
泥洹諸天告阿闍世王王追至河上毗舍離諸黎車
聞阿難來亦復來迎俱到河上阿難思惟前則阿闍
世王致恨卻則黎車復怨即於中河入火光三昧繞

身而般泥洹身二分分各在一岸二王各持半舍利
還起二塔渡河南下一由延到摩竭提國巴連佛邑
邑即是阿育王所治之城城中宮殿皆起牆闕雕文
刻鏤累大石作山山下作石室長三丈廣二丈高丈
餘有大乘婆羅門子名羅汰私婆亦名文殊師利住
此城裏爽悟多智事無不達以清淨自居國王宗敬
師事之賴此一人弘宣佛法外不能陵凡諸中國惟
此城爲大民人富盛競行仁義阿育王壞七塔作八
萬四千塔最初作大塔在城南三一作二里餘此塔前
有佛跡起精舍戶北向塔塔南有石柱圍丈四五高
三丈餘上有銘題云阿育王以閻浮提布施四方僧

還以錢贖塔北三四百步阿育王於此作泥犂城

翻

云梵稱泥犂秦言無有言
更無赦處是地獄名也

中有石柱亦高三丈餘上

有師子柱有銘記作泥犂城因緣及年數日月恒水

又東南逕小孤石山山頭有石室石室南向佛昔坐

其中天帝釋以四十二事問佛一一以指畫石畫迹

故在恒水又西逕王舍新城是阿闍世王所造出城

南四里入谷至五山裏五山周圍狀若城郭即是萍

沙王舊城也

前云瓶沙此云萍沙不知是一是二

東西五六里南北七

八里阿闍世王始欲害佛處其城空荒又無人徑入

谷搏山東南上十五里到耆闍崛山未至頂三里有

石窟南向佛坐禪處西北三

一作

十步復有一石窟

阿難坐禪處天魔波旬化作雕鷲恐阿難佛以神力
隔石舒手摩阿難肩怖即得止鳥跡手孔悉存故曰
雕鷲窟也其山峰秀端嚴是五山之最高也釋氏西
域記曰耆闍崛山在阿耨達王舍城東北西望其山
舊本此處錯簡
今據宋本改正有兩峰雙立相去二三里中道鷲鳥

常居其嶺土人號曰耆闍崛山山名耆闍鷲也又竺
法維云胡語羅閱祇國有靈鷲山胡語云耆闍崛山
山是青石頭似鷲鳥阿育王使人鑿石假安兩翼兩
脚鑿治其身今見存遠望似鷲鳥形故曰靈鷲山也
數說不同遠邇亦異今以法顯親宿其山誦首楞嚴
香華供養聞見之宗也又西逕伽耶一作那城南二十

里到佛苦行六年其

一作坐

樹處有林木

佛國記作本苦行六年處

處有林木

西行三里到佛入水洗浴天王按樹枝得攀出

池處又北行二里得彌家女奉佛乳糜處從此北行

二里佛於一大樹下石上東向坐食糜處樹石悉在

廣長六尺高減二尺國中寒暑均調樹木或數千歲

乃至萬歲從此東北行二十里到一石窟菩薩入中

西向結跏趺坐心念若我成道當有神驗石壁上即

有佛影現長三尺許今猶明亮昔天地大動諸天在

空言此非過去當來諸佛成道處去此西南行減半

由延

古本作減半由旬佛國記作減半由延按毘曇論云四肘為一弓五百弓為一拘盧舍今之二

里也

八拘盧舍為一由旬今十六里也又云

梵衆天身長半由延梵福樓天身長一由延貝多樹

下是過去當來諸佛成道處諸天尊引菩薩起行離

樹三十步天授吉祥草菩薩受之復行十五步五百

青雀飛來繞菩薩三匝而去菩薩前到貝多樹下敷

吉祥草東向而坐昔魔王遣三玉女從北來試魔王

自從南來試菩薩以足指按地魔兵卻散三女變為

老姥不自服佛國記作魔兵退散三女變老佛於尼

拘律樹下方石上東向坐梵天來諸疑作佛處四天

王捧盃處皆立塔外國事曰毘婆黎佛在此一樹下

六年長者女以金盃盛乳糜上佛佛得乳糜住足尼

連河浴浴竟於河邊噉糜竟擲盃水中逆流百步盃

投河中迦黎郊龍王接取在宮供養先三佛盃亦見

佛於河旁坐摩訶菩提樹摩訶菩提樹去貝多樹二里於此樹下七日思惟道成魔兵試佛釋氏西域記曰尼連水南流恒水水西有佛樹佛於此苦行日食糜六年西去城五里許樹東河上即佛入水浴處東上岸尼衢立樹下坐修舍女上糜於此於是西渡水於六年樹南貝多樹下坐降魔得佛也佛圖調曰佛樹中枯其來昔更生枝葉竺法維曰六年樹去佛樹五里書其異也法顯從此東南行還巴連佛邑順恒水西下得一精舍名曠野佛所住處復順恒水西下到迦尸國波羅柰城竺法維曰波羅柰國在迦維羅衛國南千二百里中間有恒水東南流佛轉法輪處

在國北二十里樹名春浮維摩所處也法顯曰城之

東北十里許即鹿野苑本辟支佛住此常有野鹿栖

宿故以名焉法顯從此還居巴連佛邑又順恒水東

行其南岸有瞻婆大國釋氏西域記曰恒曲次東有

瞻婆國城南有佉下蘭池舊作有上佉下蘭池池水恒在北佛

不說戒處也恒水又逕波麗國即是佛外祖元本此下接兩

峯雙立今國也法顯曰恒水又東到多摩梨帝國即

移於前是海口也釋氏西域記曰大秦一名黎帝康泰扶南

傳曰從迦那調洲西南入大灣可七八百里乃到枝

扈黎大江口渡江逕西行極大秦也又云發拘利口

入大灣中正西北入可一年餘得天竺江口名恒水

江口有國號擔袂屬天竺遣黃門字興為擔袂王釋
氏西域記曰恒水東流入東海蓋二水所注兩海所
納自為東西也釋氏論佛圖調列山海經曰西海之
南流沙之濱赤水之後黑水之前有大山名崑崙又
曰鍾山西六百里有崑崙山所出五水麤以佛圖調
傳也又近推得康泰扶南傳傳崑崙山正與調合如
傳自交州至天竺最近泰傳亦知阿耨達山是崑崙
山釋云賴得調傳豁然為解乃宣為西域圖以語法
汰法汰以常見怪謂漢來諸名人不應何疑作在敦
煌南數千里而不知崑崙所在也釋云一云下復書

日當作按穆天子傳穆王於崑崙側瑤池上觴西王

母云去宗周瀝澗萬有一千一百里何得不如調言

子今見泰傳非為前人不知也而今以後乃知崑崙

山為無熱丘何云乃胡國外乎余考釋氏之言未為

佳證穆天子竹書及山海經皆羶縕歲久編韋稀絕

書策落次難以緝綴後人假合多差遠意至若

古本作欲

訪地脈川不與經符驗程準途故自無會釋氏不復

根其艱歸之鴻致陳其細趣以辨其非非所安也今

按山海經曰崑崙墟在西北帝之下都崑崙之墟方

八百里高萬仞上有木禾面有九井以玉為檻面有

九門門有開明獸守之百神之所在郭璞曰此自別

有小崑崙也又按淮南之書崑崙之上有木禾珠樹

玉樹瓊樹不死樹沙棠琅玕在其東絳樹在其南碧

樹瑤樹在其北甬有四百四十門門間四里里間九

純純丈五尺甬有九井玉橫維其西北隅北門開以

納不周之風傾宮旋

舊本
作按

室縣圃涼

古本
作闔

風樊桐在

崑崙閭闔之中是其疏圃疏圃之池浸之黃水黃水

三周復其原是謂丹水飲之不死河水出其東北陬

赤水出其東南陬洋水出其西北陬凡此四水帝之

神泉以和百藥以潤萬物崑崙之丘或上倍之是謂

涼風之山登之而不死或上倍之是謂玄圃之山登

之乃靈能使風雨或上倍之乃維上天登之乃神是

謂太帝之居禹乃以息土填鴻水以爲名山掘崑崙

墟以爲下地高誘曰地或作池山海經曰不周之山
不周之北門以納不周之風則以髮歸近浮圖調之
說阿耨達六水蔥嶺于闐二水之限與經史諸書全
相乖異又按十三州說崑崙山也在西海之戌地東
海之亥地去岸十三萬里有弱水周迴繞而山東南
接積石圃西北接北戶之室東北臨大活之井西南
至承淵之谷此四角大山實崑崙之支輔也積石圃
南頭昔西王母告周穆王去咸陽三十六萬里十洲記作
王母告周穆王云咸陽三十六萬里山高平地三萬六千里上有三
陽去此四十六萬里角面方廣萬里形如偃盆上有金臺玉闕亦元氣之
所合天帝君所治處也考東方朔之言及經五萬里

之文難言浮圖調康泰之是矣六合之內水澤之藏
大非為巨小非為細存非為有隱非為無其所苞者
廣矣於中同名異域稱謂相亂亦不為寡至如東海
方丈亦有崑崙之稱西洲銅柱又有九府之治東方
朔十洲記曰方丈在東海中東西南北岸相去正
等方丈面十洲記作方丈方面各五千里上專是群龍所聚有
金玉瑠璆之宮三天司命所治處羣仙不欲升天者
皆往來也上廣故曰崑崙山有三角其一角正北於
辰星之輝名曰閼風巔其一角正西名曰玄圃臺其
一角正東名曰崑崙宮其處有積金為天墉城而方
千里城上安金臺五所玉樓十二其北戶出承淵山

又有墉城金臺玉樓相似如一淵作十淵精之闕光

碧之堂瓊華之室紫翠丹房錦雲燭日舊本作景朱

霞九光西王母之所治真宮仙虛十洲記作靈之所宗上

通璿璣元氣流布五常玉衡理九天而調陰陽品物

羣生希奇特出皆在於此天人濟濟不可具記張華

敘東方朔神異經曰崑崙有銅柱焉其高入天所謂

天柱也圍三千里員周如削下有迴屋仙人九府治

上有大鳥名曰希有南向張左翼覆東王公右翼覆

西王母背上小處無羽一萬九千里西王母歲登翼

上之東王公也故其柱銘曰崑崙銅柱其高入天員

周如削膚體美焉其鳥銘曰有鳥希有綠赤煌煌不

鳴不食東覆東王公西覆西王母王母欲東登之自
通陰陽相須唯會益工遁甲開山圖曰五龍見教天
皇被迹望在無外柱洲崑崙山上榮氏注云五龍治
在五方為行神五龍降天皇兄弟十二人分五方為
十二部法五龍之迹行無為之化天下仙聖治在柱
州崑崙山上無外之山在崑崙東南一萬二千里五
龍天皇皆出此中為十二時神也山海經曰崑崙之
丘實惟帝之下都其神陸吾是司天之九部及帝之
囿時然六合之內其苞遠矣幽致沖妙難本以情萬
象遐淵渾思絕根尋渾字疑贅根鈔本作根自不登兩龍於雲
轍騁八駿於龜途等軒轅之訪百靈方大禹之集會

計儒墨之說孰使辨哉

又出海外南至積石山下有石門河水冒以西南流

山海經曰河水出渤海又海水西北入禹所道積石

山山在隴西郡河間縣河間當作河關漢地理志云金城郡有河關縣西南

羌中余考羣書咸言河出崑崙重源潛發淪於蒲昌

出於海水故洛書曰河自崑崙出於重野謂此矣逕

積石而為中國河故成公子安大河賦曰覽百川之

弘壯莫尚美於黃河潛崑崙之峻極出積石之嵯峨

釋氏西域傳當作曰河自蒲昌潛行地下南出積石

而經文在此似如不比積石宜在蒲昌海下矣

行遠及于水也。水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水之出也。必有其源。源者。水之始也。水之出也。必有其源。源者。水之始也。

水經卷

水經卷二

漢桑欽撰

後魏酈道元注

河水二

河水又南入蔥嶺山

河水重源有三非爲二也一源西出身毒之國蔥嶺之上西去休循二百餘里皆故塞種也南屬蔥嶺高千里西河舊事曰蔥嶺在敦煌西八千里其山高大多上生蔥故曰蔥嶺也河源潛發其嶺分爲二水一水西逕休循國南在蔥嶺西郭義恭廣志曰休循國居蔥嶺其山多大蔥又逕難兜國北北接休循西南去罽賓國三百四十里

河水又西逕罽賓國北

月氏之破塞王南君罽賓治循鮮城土地平和無所
不有金銀珍寶異畜奇物踰於中夏大國也山嶽有
大頭痛小頭痛之山赤土身熱之阪人畜同然

河水又西逕月氏國南

治監氏城其俗與安息同匈奴冒頓單于破月氏殺
其王以頭爲飲器國遂分遠過大宛西居大夏爲大
月氏其餘小衆不能去者共保南山羌中號小月氏
故有大月氏小月氏之名也

又西逕安息南

城臨媯水地方數千里最大國也有商賈車船行焉

國畫革翦行爲書記也

元本此下接空須菩提至子合同乃錯簡今改正於又西

逕陀衛國注或

云縣益虛下

河水與蚘羅跂諦水同注雷翥海

釋氏西域記曰蚘羅跂諦出阿耨達山西之北逕于闐國漢書西域傳曰于闐以西水皆西流注於西海

又西逕四大塔北

釋法顯所謂竺刹尸羅國漢言截頭也佛爲菩薩時以頭施人故因名國國東有投身餓虎處皆起塔

又西逕陀衛國北

是阿育王子法益所治邑佛爲菩薩時亦於此國以眼施人其處亦起大塔又有佛樓沙國天帝釋變爲

牧牛小兒聚土爲佛塔法王因而成大塔所謂四大塔也法顯傳曰國有佛益月氏王大興兵衆來伐此國欲持益去置益象上象不能進叟作四輪車載益八象共牽復不進王知益緣未至於是起塔留益供養益容二斗雜色而黑多四際分明厚可二分甚光澤貧人以少華投中便滿富人以多華供養正復百千萬斛終亦不滿佛圖曰佛益青玉也受三斗許彼國寶之供養時願終日香華不滿則如言願一把滿則亦僂如言又按道人竺法維所說佛益在大月支國起浮圖高三十丈七層益處第二層金絡絡鑲縣益益是青石或云縣益虛空須菩提置益在金杵上

佛一足迹與蓋共在一處國王臣民悉持梵香七寶
璽玉供養塔迹佛牙袈裟頂相舍利悉在佛樓沙國
釋氏西域記曰捷陀越王城西北有益吐羅越城佛
袈裟王城也東有寺重復尋川水西北十里有河步
羅龍淵佛到上浣衣處浣石尚存其水至安息注雷
翥海又曰捷陀越西西海中有安息國竺枝扶南記
曰安息國去私訶條國二萬里國土臨海上即漢書
天竺安息國也戶近百萬最大國也漢書西域傳又
云犁靛條支臨西海長老傳聞條支有弱水西王母
亦未嘗見自條支乘水西行可百餘日近日所入也

古本作西行可月餘日或河水所通西海矣故涼土
近可十日日所入也

異物志曰蔥嶺之水分流東西西入大海東為河源

禹記所云崑崙者焉張騫使大宛而窮河源謂極於

此而不達於崑崙者也河水自蔥嶺分源東逕伽舍

羅國釋氏西域記曰有國名伽舍羅逝此國狹小而

總萬國之要道無不由城南有水東北流出羅逝西

山山即蔥嶺也逕岐沙谷出谷分為二水一水東流

逕無雷國北治盧城俗與其西夜當作其俗與西夜子合同

又東流逕依耐國北去無雷五百四十里俗同子合

又東流逕蒲犁國北治蒲犁谷北去疏勒五百五十

里俗與子合同

河水又東逕皮山國北

治皮山城西北去莎卑三百八十里按宋本下文其一源接此八十里

下里

其一源出于闐國南山北流與蔥嶺河合東注蒲昌海

河水又東與于闐河合

此上三十字疑是注按玉海引水經其一源至蒲昌海皆經文

河水又東句是注文

南源導于闐南山俗謂之仇摩置自置北流逕于闐

國西治西城西城舊本作西域上多玉石西去皮山三百八

十里東去陽關五千餘里釋法顯自烏帝西南行佛

記作路中無人民沙一本行艱難所逕之苦人理莫

比在道一月五日得達于闐其國殷庶民篤信多大

乘學威儀齊整器蓋無聲南城一十五里有利刹寺

中有石鞞石上有足跡彼俗言是辟支佛跡法顯所
不傳疑非佛跡也

又西北流注於河

即經所謂北注蔥嶺河也

南河又東逕于闐北

釋氏西域記曰河水東流三千里至于闐屈東北流
者也漢書西域傳曰于闐已東水皆東流

南河又東北逕于闐國北

前漢西域傳于闐作
于闐注云于音烏

治于闐彌城西去于闐三百九十里南河又東逕精絕

國北西去于闐四百六十里

南河又東逕且末國北

又東右會阿耨達大水釋氏西域記曰阿耨達山西
北有大水北流注牢蘭海者也其水北流逕且末南
山又北逕且末城西國治且末城西通精絕二千里
東去鄯善七百二十里種五穀兵俗略與漢同又曰
且末河東北流逕且末北又流而左會南河會流東
逝通爲注濱河注濱河又東逕鄯善國北治伊循城
故樓蘭之地也樓蘭王不恭於漢元鳳四年霍光遣
平樂監傅介子刺殺之更立後王漢又立其前王質
子尉屠耆爲王更名其國爲鄯善百官祖道橫門

城傳此下王自請天子曰身在漢久恐爲前王子所

脫一其字

害國有伊循城土地肥美願遣將屯田積粟令得依

威重遂置田以鎮撫之敦煌索勸字彥義有才略刺
史毛奕表行貳師將軍將酒泉敦煌兵千人至樓蘭
屯田起白屋召鄯善焉耆龜茲三國兵各千橫斷注
濱河河斷之日水奮勢激波凌冒隄勸厲聲曰王遵
建節河隄不溢王霸精誠呼沱不流水德神明古今
一也勸躬禱祀水猶未減乃列陣被杖鼓譟謹叫且
刺且射大戰三日水乃迴減灌浸沃衍胡人稱神大
田三年積粟百萬威服外國其水東注澤澤在樓蘭
國北扞泥城其俗謂之東故城去陽關千六百里西
北去烏壘千七百八十五里至墨山國千三百六十
五里西北去車師千八百九十里土地沙鹵少田仰

穀芻國國出玉多葭葦檉柳胡桐白草國在東垂當
白龍堆乏水草常主發導負水擔糧迎送漢使故彼
俗謂是海爲牢蘭海也釋氏西域記曰南河自于闐
東於北三千里至鄯善入牢蘭海者也北河自岐沙
東分南河即釋氏西域記所謂二支北流逕屈茨烏
夸禪當作鄯善入牢蘭海者也

北河又東北流分爲二水枝流出焉北河自疎勒逕流
南河之北

漢書釋氏西域傳曰漢書西域傳無此文當作釋氏西域記蔥嶺以東

南北有山相距千餘里東西六千里河出其中暨於
溫宿之南左合枝水上承北河於疎勒之東西北流

逕疎勒國南又東北與疎勒北山水合水出北谿東

南流逕疎勒城下南去莎車五百六十里有市列西

宋本無西字當大月氏大宛康居道釋氏西域記曰國有

佛浴牀赤真檀木作之方四尺王於宮中供養漢永

平十八年耿恭以戊己校尉爲匈奴左鹿蠡王所逼

恭以此城側澗旁水後漢書作澗澗有水可固自金蒲遷居此城

匈奴又來攻之壅絕澗水恭於城中穿井深一十五

丈不得水吏士渴乏笮馬糞汁飲之恭乃仰天歎曰

昔貳師拔佩刀刺山飛泉涌出今漢德神明豈有窮

哉整衣服向井再拜爲吏士禱之有頃水泉奔出衆

稱萬歲乃揚水以示之虜以爲神遂即引去後車師

叛與匈奴攻恭食盡窮困乃煮鎧弩食其筋革恭與
士卒同生死咸無二心圍恭不能下關寵上書求救
建初元年明帝納司徒鮑昱之言遣兵救之至柳中
以校尉關寵分兵入高昌壁攻交河城車師降遣恭
軍吏范羌將兵二千人迎恭遇大雪丈餘僅能至城
中夜聞兵馬大恐羌逕後漢書作遙呼曰我范羌也城中
皆稱萬歲開門相持涕泣尚有二十六人衣履穿浹
形容枯槁相依而還

北河又東逕莎車國南

治莎車城西南去蒲犁七百四十里漢武帝開西域

屯田於此有鐵山出青玉

北河之東南逕溫宿國

治溫宿城土地物類與鄯善同北至烏孫赤谷六百一十里東通姑墨二百七十里於此枝河右入北河北河又東逕姑墨國南

入姑墨川水注之導姑墨西北赤沙山東南流逕姑墨國西治南至于闐馬行十五日土出銅鐵及雌黃其水又東南流右注北波河又東逕龜茲國南又東左合龜茲川水有二源西源出北大山南釋氏西域記曰屈茨北二百里有山夜則火光晝日但煙人取此山石炭冶此山鐵恒充三十六國用故郭義恭廣志龜茲能鑄冶其水南流逕赤沙山釋氏西域記曰

國北四十里山上有寺名雀離大清淨又出山東南
流枝水左派焉又東南水流三分右二水俱東南流
注此河又東川水龜茲東北赤沙積黎南流枝水右
出西南入龜茲城音丘茨也故延城矣西去姑墨六
百七十里川水又東南流逕於輪臺之東也昔漢武
帝初通西域置校尉屯田於此搜粟都尉桑弘羊奏
言故輪臺以東地廣饒水草有溉田五千頃以上其
處溫和田美可益通溝渠種五穀收穫與中國同昔
匈奴弱不敢近西域於是徙莎車相去千餘里即是
臺也其水又東南流右會西川枝水水有二源俱受
西川東流逕龜茲城南合爲一水水間有故城蓋屯

校所守也其水東南注東川東川水又東南逕烏壘
國南治烏壘城西去龜茲三百五十里東去玉門陽
關二千七百三十八里與渠犂田官相近土地肥饒
於西域爲中故都護治焉漢使持節鄭吉并護北道
故號都護都護之起自吉置也其水又東南注大河
大河又東右會敦薨之水其水出焉耆之北敦薨之
山在匈奴之西烏孫之東山海經曰敦薨之水出焉
而西流注於泐澤出於崑崙之東北隅實惟河源者
也二源俱道西源東流分爲二水西南流出於焉耆
之西經流焉耆之野屈南疑作而東南流注於敦薨之
渚右水東南流又分爲二左右焉耆之國城居四水

之中在河水之洲治員渠城西去烏壘四百里南會

兩水同注敦薨之浦東源東南流分爲二水但澗瀾

雙引洪湍濬發俱東南流逕出焉耆之東導於危須

城西國治危須城西去焉耆百里又東南流注於敦

薨之藪川流所積渾水斯漲溢流爲海古本作溢海

改作溢流宋鈔史記曰焉耆近海多魚鳥東北隔大

山與車師接敦薨之水自西海逕尉犁國國治尉犁

城西去都護治所三百里北去焉耆百里其水又西

出沙山鐵關谷又西南流連城別注裂以爲田桑弘

羊曰臣愚以爲連城以西可遣屯田以威西國即此

處也其水又屈而南逕渠犂國西故史記曰西有大

河即斯水也又東南流逕渠犂國治渠犂城西北去
烏壘三百三十里漢武帝通西域屯渠犂即此處也
南與精絕接東北與尉犂接又南流注於河山海經
曰敦薨之水西流注於泐澤蓋亂河流自西南注也
河水又東逕墨山國南治墨山城西至尉犂二百四
十里

河水又東逕注賓城南又東逕樓蘭城南而東注
蓋發田土所屯故城禪國名耳

河水又東注於泐澤

即經所謂蒲昌海也水積鄯善之東北龍城之西南
龍城故姜賴之靈胡之大國也蒲海溢盪覆其國城

基尚存而至元晨發西門暮達東門澮其岸岸餘溜

風吹稍成龍形皆西面向海因名龍城地廣千里皆

為鹽而剛堅也

此注譌錯難以意通據御覽所引涼州異物志云姜賴之虛今稱龍城恒

溪無道以感天庭上帝赫怒海溢盪傾剛鹵千里羨藜之形其下有鹽累碁而生即此事也行人

所逕畜產皆布氈臥之掘發其下有大鹽方如巨桃

宋本作枕以次相累類霧氣雲浮寡見星日少禽多鬼怪

西接鄯善東連三沙為海之北隘矣故蒲昌亦有鹽

澤之稱也山海經曰不周之山北望諸毗之山臨彼

岳崇之山東望泐澤河水之所潛也其源渾渾泡泡

者也東至玉門陽關一千三百里廣袤三百里其水

澂渟冬夏不減其中洄湍電

御覽作雷

轉為隱淪之脈當

水經卷二
四十五
還流之上飛禽奮翮於霄中者無不墜於淵波矣即
河水之所潛而出於積石也

又東入塞過敦煌酒泉張掖郡南

河自蒲昌有隱淪之證竝間關入塞之始自此經當
求實致也河水重源又發於西塞之外出於積石之
山山海經曰積石之山其下有石門河水冒以西南
流是山也萬物莫不有焉禹貢所謂導河自積石也
山在西羌之中燒當所居也延熹二年西羌燒當犯
塞護羌校尉段熲討之追出塞至積石山斬首而還
司馬彪曰西羌者自析支以西濱於河首在右居也
河水屈而東北流逕於析支之地是為河曲矣應劭

曰禹貢析支屬雍州在河關之西東去河關千餘里
羌人所居謂之河曲羌也東北逕歷敦煌酒泉張掖
南應劭地理風俗記曰敦煌酒泉其水甘若酒味故
也張掖言張國臂掖以威羌狄說文曰郡制天子地
方千里分爲百縣縣有四郡故春秋傳曰上大夫縣
下大夫郡至秦始皇置三十六郡以監縣矣從邑君聲
釋名曰郡羣也人所羣聚也黃義仲十三州記曰郡
之言君也改公侯之封而言君者至尊也郡守專權
君臣之禮彌崇今郡字君在其左邑在其右君爲元
首邑以載民故取名於君謂之郡漢官曰秦用李斯
議分天下爲三十六郡凡郡或以列國陳魯齊吳是

水經卷二
十一
也或以舊邑長沙丹陽是也或以山陵太山山陽是也或以川原西河河東是也或以所出金城城下得金酒泉泉味如酒豫章樟樹生庭鴈門鴈之所育是也或以號令禹合諸侯大計東冶之山會計國名會稽是也河逕其南而纏絡遠矣

河水又自東河曲逕西海郡南

漢平帝時王莽秉政欲耀威德以服遠方諷羌獻西海之地置西海郡而築五縣焉周海亭燧相望莽篡政紛亂郡亦棄廢

河水又東逕允川而歷大榆小榆谷北

羌迷唐鍾存所居也永元五年貫友代聶尚為護羌

拔尉攻迷唐斬獲八百餘級收其熟麥數萬斛於逢
留河上築城以盛麥其作大船於河峽作橋渡兵迷
唐遂遠依河曲永元八年迷唐復與鍾存東寇而還
十年謁者王信耿譚西擊迷唐降之詔聽還大小榆
谷迷唐種人以漢造河橋兵來無時故地不可居復
叛居河曲與羌爲讎種人與官兵擊之允川去迷唐
數十里營止遣輕兵挑戰因引還迷唐追之至營因
戰迷唐敗走於是西海及大小榆無復聚落隄廩相
曹鳳上言建武以來西戎數犯法常從燒當種起所
以朕者以其居大小榆谷土地肥美又近塞內與諸
種相芴南得鍾存以廣其衆北阻大河因以爲固又

有西海魚鹽之利緣山濱水以廣田畜故能彊大常
雄諸種今黨援壞沮親屬離叛其餘勝兵不過數百
宜及此時建復山海郡縣規固二榆廣設屯田隔塞
羌胡交關之路殖穀富邊省輪轉之役上拜鳳爲金
城西部都尉遂開田二十七部夾河與建威相首尾
後羌反遂罷按段國沙州記吐谷渾於河上作橋謂
之河厲長一百五十步兩岸累石作基陞節節相次
大木從橫更鎮壓兩邊俱來相去三丈竝大材以板
橫次之施鉤欄甚嚴飾橋在清水川東也

又東過隴西河關縣北洮水從東南來流注之

河水又逕沙州北段國曰澆河

段國沙州記云洮水與墊江水俱出強臺

山而此注說澆水知
洮字乃傳寫之誤耳

西南一百七十里有黃沙沙南

北一百二十里東西七十里西極大陽川望黃沙猶

若人委干楛於地

御覽引段國沙州記
作若人委乾楛於地

都不生草木

蕩朕黃沙周迴數百里沙州於是取號焉地理志曰

漢宣帝神爵二年置河關縣蓋取河之關塞也風俗

通曰百里曰同總名為縣縣玄也首也從系倒首與

縣易偏矣言當玄靜徭役也

御覽引作玄靜平徭
役今本風俗通缺

釋

名又曰縣也縣於郡矣黃義仲十三州記曰縣弦也

弦以貞直言下體之居鄰民之位不輕其誓施繩用

法不曲如弦弦聲近縣故以取名今縣字在羊也漢

帝元年令天下縣邑城

漢書作漢
高帝六年

張晏曰令各自築

其城也

河水又東北流入西卑郡界左合二川南流入河又東

北濟川水注之

據後注西卑當作西平

水西南出濫瀆東北流入大谷謂之大谷水北逕澆河城西南北流注於河

河水東又逕澆河故城北

有二城東西角倚東北去西平二百二十里宋少帝景平中拜吐谷渾阿豺爲安西將軍澆河公即此城也

河水又東北逕黃川城河水又東逕石城南左合北谷水

昔段熲擊羌於石城投河墜坑而死者八百餘人即於此也

河水又東北逕黃河城南

西北去西平二百一十七里

河水又東北逕廣違城北又合烏頭川水

水發遠川引納支津北逕城東而北流注於河

河水又東逕邯川城南

城之左右歷谷有三水導自北山南逕邯亭注於河

河水又東臨津谿水注之

水自南山北逕臨津城西而北流注於河

河水又東逕臨津城北白土城南

十三州志曰左南津西六十里白土城城在大河之

北而爲緣河濟渡之處北魏涼州刺史郭淮破羌遮

寒

魏志作寒

於白土即此處矣

河水又東左會白土川水

水出白土城西北下東南流逕白土城北又東南注

於河

河水又東北會兩川右合二水

參差夾岸連壤

舊本作襄

負嶮相望河北有層山山甚靈

秀山峰之上立石數百丈亭亭桀竪競勢爭高遠望

參參若攢圖之託霄上其下層巖峭舉壁岸無楷縣

巖之中多石室焉室中若有積卷矣而世士罕有津

逮者因謂之積書巖巖堂之內每時見神人往還矣
蓋鴻衣羽裳之士練精餌食之夫耳俗人不悟其仙
者乃謂之神鬼彼羌目鬼曰唐述復因名爲之唐述
山指其堂密之居謂之唐述窟其懷道宗玄之士皮
冠淨髮之徒亦往棲託焉故秦川記曰河峽崖旁有
二窟一曰唐述窟高四十丈西二里有時亮窟高百
丈廣二十丈深三十丈藏古書五字當作亮南安人
也下封當作崖下有水導自是山谿水南注河謂之唐述
水

河水又東得野亭南

又東北流得研川謂之研川水又東北注於河謂之

野城口

河水又東歷鳳林北

鳳林山名也五巒俱峙耆諺云昔有鳳鳥飛遊五峰故山有斯目矣秦州記曰枹罕原北名鳳林川川中則黃河東流也

河水又東與灤水合

水導源塞外羌中故地理志曰其水出西塞外東北流歷野虜中逕消銅城西又東逕河列城東考地說無目蓋出自戎方矣左右列水水出西北谿東北流逕列城北又入灤水城居二水之會也灤水又北逕

可石孤城西西戎之名也又東北石

疑作右

合黑城谿

水水出西北谿下東南流逕黑城南又東南枝水左
出焉又東南入灑水又東北逕榆城東榆城谿水注
之水出素和細越西北山下東南流逕於細越川夸
俗鄉名也又東南出狄周峽東南右合黑城谿之枝
津津水上承谿水東北逕黑城東東北注之榆谿又
東南逕榆城南東北注灑水灑水又東北逕石門口
山高嶮絕對岸若門故峽得厥名矣疑即皋蘭山門
也漢武帝元狩三年驃騎霍去病出隴西至皋蘭應
謂是山之關塞也漢書音義曰皋蘭應在隴西白石
縣塞外河名也孟康曰山關名也今是山去河不遠
故論者疑目河山之間矣灑水又東北皋蘭山水自

山左右翼注瀼水瀼水又東白石川水注之水出縣西北下東南流枝津東注焉白石川水又南逕白石城西而注瀼水水又東逕白石縣故城南王莽更曰順礫闕駟曰白石縣在狄道西北二百八十五里瀼水逕其北今瀼水逕東南注之而不出其北也瀼水又東逕白石山北應劭曰白石山在東羅谿注之水出西南山下東入瀼水水又東左合罕开南谿水出罕开西東南流逕罕开南十三州志曰廣大阪在枹罕西北罕开在焉昔慕容吐谷渾自燕歷陰山西馳而創居於此瀼水又東逕枹罕縣故城南應劭曰故罕羌侯邑也十三州志曰枹罕縣在郡西二百一十

里灘水在城南門前東過也灘水又東北故城川水注之水有二源南源出西南山下東北流逕金細北嶺北又東北逕一故城南又東北與北水會北源自西南逕故城北右入南水亂流東北注灘水灘水又東北左合白石川之枝津水上承白石川東逕白石城北又東絕罕开谿又東逕枹罕城南又東入灘水灘水又東北出峽北流注於河地理志曰灘水出白石縣西塞外東至枹罕入河

河水又逕左南城南

十三州志曰石城西一百四十里有左南城者也津

亦取名焉

大河又東逕赤岸北

一即河夾岸也秦州記曰枹罕有河夾岸岸廣四十丈
義熙中乞佛於此河上作飛橋橋高五十丈三年乃
就

河水又東洮水注之

地理志曰水出塞外羌中沙州記曰洮水與墊江水
俱出嶽臺山山南即墊江源山東則洮水源山海經
曰白水出蜀郭景純注云從臨洮之西傾山東南流
入漢而至墊江故段國以爲墊江水也洮水同出一
山故知嶽臺西傾之異名也洮水東北流吐谷渾中
吐谷渾者始是東燕慕容之枝庶因氏其字以爲首

類之種號也故謂之野虜自洮強南北三百里中地
草徧是龍須而無樵柴洮水又東北流逕陽曾城北
沙州記曰強城東北三百里有曾城城臨洮水者也
建初二年羌攻南部都尉於臨洮上遣行車騎將軍
馬防與長水校尉耿恭救之諸羌退聚洮陽卽此城
也洮水又東逕共和山南城在四山中洮水又東逕
迷和城北羌名也又東逕甘枳亭歷望曲在疑作西
南去龍桑二百里洮水又東逕臨洮縣故城北禹治
洪水西至洮水之上見長人受黑玉書於斯水上洮
水又東北流屈而逕索西城西建初二年馬防耿恭
從五谿祥盭一作盭谷出索西與羌戰破之築索西城

徙隴西南部都尉居之赤水城亦曰臨洮東城也沙

州記曰從東洮至西洮一百二十里者也洮水又屈

而北逕龍桑城西而西北流馬防以建初二年從安

故五谿出龍桑開通舊路者也俗名龍城洮水又西

北逕步和亭東步和川水注之水出西山下東北流

出山逕步和亭北東北注洮水洮水又北出門峽歷

求一作東厥川蕈川水注之水出桑嵐西谿東流歷桑

嵐川又東逕蕈川北東入洮水洮水又北歷峽逕偏

橋出夸始梁右合蕈塏川水東南石底嶺下宋本作右底橫

下北歷蕈塏川西北注洮水洮水又東北逕桑城東

又北會藍川水水源出來歷川西北谿南流歷川東

北流逕藍川歷水城城北東入洮水洮水又北逕外

羌城西又北逕和博城東城在山內左合和博川川

水出城西南山下東北逕和博城南東北注於洮水

洮水北逕安故縣故城西地理志曰隴西之屬縣也

十三州志曰縣在郡南四十七里蓋延轉擊狄道安

故五谿及羌大破之即此也洮水又北逕降狄道故

城西闕駟曰今日武始也洮水在城西東北下又北

壟當作隴水注之即山海經所謂濫水也水出鳥鼠山

西北高城嶺西逕底宋本作西其山岸崩落者聲聞

數百里故揚雄稱響若坻頽是也又西北歷白石山

下地理志曰降狄道東有白石山濫水又西北逕武

階城南又西北逕降狄道故城東百官表曰縣有蠻
一夸謂之道有公主謂之邑應劭曰反舌左衽不與華
同須有譯言乃通也漢隴西郡治秦昭王二十八年
置應劭曰有隴坻在其東故曰隴西也神仙傳曰封
君達隴西人服鍊水銀年百歲視之如年三十許騎
青牛故號青牛道士王莽更郡縣之名郡曰厭戎縣
曰操虜也昔馬援爲隴西太守六年爲狄道開渠引
水種秔稻而郡中樂業即此水也濫水又西北流逕
注於洮水洮水右合二水右會大夏川水水出西山
二源合舍而亂流逕金柳城南十三州志曰大夏縣
西有故金柳城去縣四十里本都尉治又東逕大夏

縣故城南地理志曰王莽之順夏晉書地道記曰縣有禹廟禹所出也又東北出山注於洮水洮水又北翼帶三水亂流北入河地理志曰洮水北至枹罕東入河是也

又東過金城允吾縣北

金城郡治也漢昭帝始元六年置王莽之西海也莽又愛允吾爲修遠縣河水逕其南不在其北南有湟水出塞外東逕西王母石室石釜西海鹽池北故闕駟曰其西即湟水之源也地理志曰湟水所出也湟水又東南流逕龍夸城故西零之地也十三州志曰城在臨羌新縣西三百一十里王莽納西零之獻以

爲西海郡治北城湟水又東南逕卑禾羌海北有鹽池闕駟曰縣西有卑禾羌海者也世謂之青海東去西平二百五十里湟水東流逕湟中城北故小月氏之地也十三州志曰西平張掖之間大月氏之別小月氏之國范曄後漢書曰湟中月氏胡者其王爲匈奴所殺餘種分散西踰蔥嶺其弱者南入山從羌居止故受小月氏之名也後漢西羌傳曰羌無弋援劍者秦厲公時以奴隸亡入三河羌爲神推以爲豪河湟之間多禽獸以射獵爲事遂見敬信依者甚衆其曾孫忍因留湟中爲湟中羌也湟水又東右控四水道源四谿東北流注於湟湟水又東逕赤城北而東

入經戎峽口右合羌水出西南山下逕護羌城東故
護羌校尉治又東北逕臨羌城西東北流於湟水
又東逕臨羌縣故城北漢武帝元狩六年以封孫都
爲侯國土莽之監羌也謂之綏戎城非也湟水又東
盧谿水注之水出西南盧川東北流注於湟水湟水
又東逕臨羌新縣故城南關駟曰臨羌新縣在郡西
百八十里湟水逕城南也城有東西門西北隅有子
城注水又東右合溜谿伏溜石杜蠡四川東北流注
之左會臨羌谿水水發新縣西北東南流歷縣北東
南入湟水湟水又東龍駒川水注之水又出西南山
下東北流逕龍駒城北流注於湟水湟水又東長寧

川水注之水出松山東南流逕晉昌川晉昌川水注
之長寧水又東南養女川水注之水發養女北山有
二源皆長湍遠發南總養女川逕養女山謂之養女川
關駟曰長寧亭北有養女嶺即浩臺之西平之北山
也亂流出峽南逕長寧城長寧城有東西門東北隅有
金城兩平西北四十里十三州志曰六十里遠矣長
寧水又東南與一水合水出西山東南流水出南山
上有風伯祠春秋祭之其水東南逕長寧亭南東入
長寧水長寧水又東南流注於湟水湟水又東牛心
川水注之水出其南遠山東北流逕牛心堆東占本
心堆御覽引湟水注云牛心堆乃湟又北逕西平亭
水源山名也吳本改作牛心川非矣

西東北入湟水湟水又逕西平城北東城即故亭也
漢景帝六年封隴西太守北地公孫渾邪爲侯國魏
黃初中立西平郡馮倚故亭增築南西北三城以爲
郡治湟水又東逕土樓南樓北倚山原峰高三百尺
有若削成樓下有神祠彫牆故壁存焉鬪駟曰西平
亭北有土樓神祠者也今在亭東北五里右則五泉
注之泉發西平亭北鴈次相綴東北流至土樓南北
入湟水湟水又東右合蔥谷水水有四源各出一谿
亂流注於湟水又東逕東亭北東出漆峽山峽也東
流右則漆谷常谿注之左則甘夷川水入焉湟水又
東安夸川水注之水發遠山西北逕控衆川北屈逕

安夷城西北東入湟水湟水又東逕安夷縣故城城有東西門去西平亭東七十里闕駟曰四十里湟水

又東左合宜春水水出東北宜春谿西南流至於安

夷南入湟水湟水又東勒且谿水注之水出縣東南

勒且谿北流逕安夷城東而北入湟水湟水有勒且

之名疑即此號也

勒且後漢書耿恭傳作勒姐注云姐音紫

闕駟曰金城

河初與浩疊河合又與勒且河合者也湟水又東左

合承流谷水南入右會達扶東西二谿水參差北注

亂流東出六山名也東流期頓雞谷二水北流注之

吐那

疑作那

孤長門兩川南流入湟水湟水又東逕樂

都城南東流又合來谷乞斤流二水左會陽非流谿

細谷三水東逕破羌縣故城南應劭曰漢宣帝神爵
二年置城省南門十三州志曰湟水河在南門前東
過六谷水自南破羌川自北左右翼注湟水又東南
逕小晉興城北故都尉治闕駟曰允吾縣西四十里
有小晉興城也湟水又東與閣門河合即浩疊河也
出西北塞外東入塞逕敦煌酒泉張掖南東南逕西
平之鮮谷塞尉故城南又東南與湛水合水有二源
西水出白嶺下東源發於白崖谷合爲一川東南流
至霧山注閣門河閣門河又東逕養女北山東南左
合南流川水出北山南流入於閣門河河又東逕浩
疊縣故城南王莽改曰興武矣闕駟曰浩讀閣也故

亦曰閤門水兩兼其稱矣

孟康漢志注云浩疊音閤門今俗呼此水為閤門水

又東流注於湟水故地理志曰浩疊水東至允吾入

湟水又東逕允吾縣北為鄭伯津與潤

漢志作潤

水合水

出縣北令居縣西北塞外南流逕其縣故城西漢武

帝元鼎二年置王莽之罕虜也又南逕永登亭西歷

黑石谷南流注鄭伯津湟水又東逕允街縣故城南

漢宣帝神爵二年置王莽之修遠亭也縣有龍泉出

允街谷泉眼之中水文成蛟龍或試撓破之尋平成

龍畜生將飲者皆畏避而走謂之龍泉下入湟水湟

水又東逕枝楊縣逆水注之水出允吾縣之參街谷

東南流逕街亭城南又東南逕陽非北亭又東南逕

廣武城西故廣武都尉治郭淮破叛羌故無載

魏志作治

無載乃於此處也城之西南二十許里水西有馬蹏

谷漢武帝聞大宛有天馬遣李廣利伐之始得此馬

有角為奇故漢賦天馬之歌曰天馬來兮歷無阜逕

千里兮巡東道胡馬感北風之思遂頓羈絕絆驤首

而馳晨發京城食時至敦煌北塞外長鳴而去因名

其處曰候馬亭今晉昌郡南及廣武馬蹏谷盤石上

馬跡若踐泥中有自朕之形故其俗號曰天馬徑夸

人在邊效刻是疑作足有大小之迹體狀不同視之便

別逆水又東逕枝陽縣故城南東南入於湟水地理

志曰逆水允吾東至枝陽入湟河又東流注於金城

河即積石之黃河也闕駟曰河至金城縣謂之金城
河隨地爲名也釋氏西域記曰牢蘭海東伏流龍沙
堆在屯皇東南四百里河步於鮮卑山東流至金城
爲大河出崑崙崑崙即阿耨達山也

河水又東逕石城南

謂之石城津闕駟曰在金城西北矣河水又東南逕
金城縣故城北應劭曰初築城得金故曰金城也漢
書集註辭瓚云金者取其堅固也故墨子有金城湯
池之言矣王莽之金屏也世本曰鯀作城風俗通曰
城盛也從土成聲管子曰內爲之城外爲之郭郭外
之土開池高則溝之命之曰金城十三州志曰大河

在金城北門東流有梁泉注之出縣之南山按耆舊
言梁暉字始娥漢大將軍梁冀後冀誅入羌後其祖
父爲羌所推爲渠帥而居此城土荒民亂暉將移居
枹罕出頓此山爲羣羌圍迫無水暉以所執榆鞭豎
地以青羊祈山神泉涌出榆木成林其水自縣北流
注於河也

又東過榆中縣北

昔蒙恬爲秦北逐戎人開榆中之地按地理志曰金
城郡之屬縣也故徐廣史記音義曰榆中在金城即
阮嗣宗勸進文所謂榆中以南者也

又東過天水北界

苑川水出勇士縣之子城南山東北流歷此城川世

謂之子城川又北逕牧師苑故漢牧苑之地也羌豪

述吾漢書通典並作迷吾等萬餘人到襄武首陽平襄勇士至

抄此苑馬當作馬焚燒亭驛即此處也又曰苑川水地

為龍馬之沃土故馬援請與田戶中分以自給也有

東西二苑城相去七里西城即乞佛所都也又北入

於河也

又北過武威媼圍縣東北

河水逕其界東北流縣西南有泉源東逕其縣南又

東北入河也

又東北過天水勇士縣北

地理志曰蒲福也屬國都尉治

蒲福當作滿福前漢地志勇士縣注云屬

國都尉治滿福

王莽愛名之曰紀德水出縣山世謂之二十

八渡水東北流谿澗縈曲途出其中逕二十八渡行者勤於溯涉故因名焉北逕其縣而下注河又有赤暕川水南出赤蒿谷北流逕赤暕川又北逕牛官川又北逕義城西北北流歷三城川而北流注於河也又東北過安定北界麥田山河水東北流逕安定祖厲縣故城西北

漢武帝元鼎五年幸雍遂踰隴登空同西臨祖厲河

而還即於此也王莽愛名之曰鄉禮也李斐曰音賴

漢地志安定郡有祖厲縣本紀李斐注云祖厲音嗟賴

又東北祖厲川水注之

水出祖厲南山北流逕祖厲縣而西北流注於河水
河水又東北逕麥田城西又北與麥田泉水合

水出城西北西南流注於河

河水又東北逕麥田山西

宋鈔本西下有谷川二字

在安定西北六百四十里

河水又東北逕于黑城北又東北高平川水注之

即若水也水出高平大壟山若水谷建武八年世祖

征隗囂漢從高平第一城若水谷入即是谷也東北

流逕高平縣故城東漢武帝元鼎三年安定郡治也

王莽更名其縣曰鋪睦西十里有獨阜阜上有故臺

臺側有風伯壇故世俗呼此阜為風堆其水又北龍

泉水注之水出縣東北七里龍泉東北流注高平川

川水又北出秦城

宋本無又字秦城字作長城

長城在縣北一十

五里又西北流逕東西二太

疑太字

婁故城門北合一

水水有五源咸出隴山西東水發源縣西南二十六

里湫淵淵在四山中湫水北流西北出長城北與次

水會水出縣西南四十里長城西山中北流逕魏行

宮故殿東又北次水注之出縣西南四十里山中北

流逕行宮故殿西又北合次水水出縣西南四十八

里東北流又與次水合水出縣西南六十里

醜宋本作酸

陽山東北流左會右水總為一川東逕西婁北東注

若水段頌為護羌校尉於安定高平若水討先零斬

首八千級於是水之上若水又北與石門水合水有五源東水導源高平縣西八十里西北流次水注之水出縣西百二十里如州泉東北流右入東水亂流左會三川參差相得東北同爲一川混濤歷峽峽即隴山之北垂也謂之石門口水曰石門水在縣西北八十餘里石門之水又東北注高平川川水又北自延水注之西出自延谿東流歷峽謂之自延口縣之西北一百里又東北逕延城南東入高平川川水又北逕廉城東按地理志曰北地有廉城縣關駟言在富平北自昔匈奴侵漢新秦之土率爲狄場故城舊壁盡從故目地理淪移不可復識當是世人誤證也

川水又北若水注之水發縣東北百里山流注高平
高平又北遯三水縣西肥水注之水出高平縣西北
二百里牽條山西東北流與若勃谿水合有二源總
歸一瀆東北流入肥肥水又東北流違泉水注焉泉流
所發導於若勃谿東東北流入肥肥水又東北出峽
注於高平川水東有山山東有三水縣故城本屬國
都尉治王莽之廣延亭也西南去安定郡三百四十
里侍郎張奐爲安定屬國都尉治此羌有獻金馬者
奐召主簿張祁入於羌前以酒酹地曰使馬如羊不
以入虜使金如粟不以入懷盡還不受威化大行縣
東有溫泉溫泉東有鹽池故地理志曰縣有鹽官今

於城之東北有故城城北有三泉疑即縣之鹽官也

高平川水又北入於河

宋本河下有一沟字

河水又東北逕昫卷縣故城西

地理志曰河水別出爲河溝東至富平北入河河水於此有上河之名也

水經卷三

漢桑欽撰

後魏酈道元注

河水三

河水又北過北地富平縣西

河側有兩山相對水出其間即上河峽世謂之爲青山河水歷峽北注枝分東出

河水又北逕富平縣故城西

秦置北地都尉治縣城王莽名郡爲威戎縣曰特武建武中曹鳳字仲理爲北地太守政化尤異黃龍應於九里谷高岡亭角長三尺大十圍稍至十餘丈天子嘉之賜帛百匹加秩中二千石

河水又北薄骨律鎮城

城在河渚上赫連果城也桑果餘林仍列洲上但語
出戎方不究城名訪諸耆舊咸言故老宿彥言赫連
之世有駿馬死此取馬色以爲邑號故目城爲白口
騮韻之謬韻字下當有轉字謂白遂仍今稱所未詳
也

河水又逕典農城東

世謂之胡城又北逕上河城東世謂之漢城粹瓚曰
上河在西河富平縣即此也馮參爲上河典農都尉
所治也

河水又北逕典農城東

俗名之為呂城皆參所屯以事農

宋本農有一毗字

河水又東北逕廉縣故城東

王莽之西河亭地理志曰卑移山在西北

河水又與北枝津合

水受大河東北逕富平城所在分裂以溉田圃北流入河今無水爾雅曰澮反入言河淩復入者也河之有澮若漢之有潛也

河水又東北逕渾懷鄣西

地理志曰渾懷都尉治塞外者也太和初三齊平徙歷下民居此遂有歷地之名矣南去北城三百里

漢志

渾懷都尉治在北平此作北城誤

河水又東北逕

一作歷

石崖山西

去北城五百里山石之上自然有文盡若戰馬之狀
粲然成著類似圖焉故亦謂之畫石山也

又北過朔方臨戎縣西

河水東北逕三封縣故城東漢武帝元狩三年置十
三州志曰在臨戎縣西一百四十里

河水又北逕臨戎縣故城西

元朔五年立舊朔方郡治王莽之所謂推武也

河水又北有枝渠東出謂之銅口東逕沃野故城南

漢武帝元狩三年立王莽之綏武也枝渠東注以溉

田所謂智通在我矣

河水又北屈而爲南河出焉河水又北迤西溢於窳渾
縣故城東

漢武帝元朔二年開朔方郡治又有西部都尉治有
道自縣西北出雞鹿塞王莽更郡曰溝搜縣曰極武
其水積而爲屠申澤澤東西一百二十里故地理志
曰屠申澤在縣東即是澤也關駟謂之渾澤矣屈從
縣北流

河水又屈而東流爲北河東逕高關南

史記趙武靈王旣襲胡服自代竝陰山下至高關爲
塞山下有長城長城之際連山刺天其山中斷兩岸
雙闕善能雲舉望若闕焉節狀表目故有高關之名

也自關北出荒中關口有城跨山結局謂之高關戍
上古迄今常置重捍以防塞道漢元朔四年衛青將
十萬人敗右賢王於高關即此處也河水又東逕臨
河縣故城北漢武帝元朔三年封代恭王子劉賢為
侯國王莽之監河也漢武帝元朔二年大將軍衛青
絕梓嶺梁北河是也至河目縣西

河水自臨河縣東逕陽山南

漢書注曰陽山在河北指此山也東流逕石迹阜西
是阜破石之文悉有鹿馬之跡故斯阜納稱焉南屈
逕河目縣左北假地名也自高關以東夾山帶河陽

山以去

宋本作
以西

皆北假也史記曰秦使蒙恬將十萬

入北擊胡度河取高闕據陽山北假中是也北河又南合南河上承西河東逕臨戎縣故城北又東逕臨河縣南又東逕廣牧縣故城北有東部都尉治王莽之鹽官也逕流二百許里東會於河

河水又南逕馬陰山西

漢書音義曰陽山在河北陰山在河南謂是山也而即實不在河南史記音義曰五原安陽縣北有馬陰山今山在縣北言陰山在河南又傳疑之非也余按南河北河及安陽縣以南悉沙阜耳無他異山故廣志曰朔方郡北移沙七所而無山以擬之是議誌之僻也陰山在河東南則可矣

河水又東南逕朔方縣故城東北

詩所謂城彼朔方也漢元朔二年大將軍衛青取河
南地為朔方郡使校尉蘇建築朔方城即此城也王
莽以為武符者也按地理志云今連鹽澤青鹽澤並
在縣南矣又按魏土地記曰縣有大鹽池其鹽大而
青白名曰青鹽又名戎鹽入藥分漢置典官鹽池去
平地疑作平城宮千二百里在新秦之中服虔曰新秦地
名在北方千里如淳曰長安以北朔方以南也薛瓚
曰秦逐匈奴收河南地徙民以實之謂新秦也屈南
過五原西安陽縣南

河水自朔方東轉逕渠搜縣故城北

地理志曰朔方有渠搜縣中部都尉治王莽之溝搜
亭也禮三朝記曰北發渠搜南撫交阯此與北對南
禹貢之所云析支渠搜矣河水又逕西安陽故城王
莽更之曰鄣安矣河水東逕田辟城南地理志曰故
西部都尉治也屈東過九原縣南

河水又東逕成宜縣故城南

王莽更曰艾虜也

河水又東逕原亭城南

關駟十三州志曰中部都尉治

河水又東逕宜梁縣之故城南

關駟曰五原西南六十里今世謂之石崖城

河水又東逕稠

宋本作稠

陽城南

東部都尉治逕河陰縣故城北又東逕九原縣故城

南秦始皇置九原郡治此漢武帝元朔二年更名五

原也王莽之獲降郡成平縣矣西北接對一城蓋五

原縣之故城也王莽之填河亭也竹書紀年云魏襄

王十七年邯鄲命吏大夫奴遷於九原又命將軍大

夫適子伐吏

今竹書紀年作代史

皆貂服矣其城南面長河北

背連山秦始皇逐匈奴並河以東屬之陶山築亭鄣

爲河上塞徐廣史記音義曰陶山在五原北即此山

也始皇二十四年起自臨洮東暨遼海西竝陰山築

長城及南越地晝警夜作民勞怨苦故楊泉物理論

曰秦始皇使蒙恬築長城死者相屬民歌曰生男慎
勿舉生女哺用舖不見長城下尸骸相支柱其冤痛
如此矣蒙恬臨死曰夫起臨洮屬遼東城塹萬餘里
不能不絕地脈此固當死也

又東過臨沃縣南

王莽之振武也

河水又東枝津出焉河水又東流石門水南注之

水出石門山地理志曰北出石門郭即此山也西北

趣光祿城甘露三年呼韓邪單于還詔遣長樂衛尉

高昌侯董忠車騎都尉韓昌等將萬六千騎送單于

居幕南堡光祿徐自爲所築城也故城得其名矣城

東北即懷朔鎮城也其水自鄯東南流逕臨沃城東
東南注於河

河水又東逕稠陽縣故城南

王莽之固陰也地理志曰自縣北出石門鄯河水沒
其西南隅又東南枝津注焉水上承大河於臨沃縣
東流七十里北溉田南北二十里注於河

河水又東逕塞泉城南而東注又東過雲中楨陵縣南
又東過沙南縣北從縣東屈南過沙陵縣西
大河東逕咸陽縣故城南王莽之賁武也

河水屈而流白渠水注之

水出塞外西逕定襄武進縣故城北西部都尉治王

莽更曰伐蠻世祖建武中封趙慮爲侯國也白渠水西北逕成樂北郡國志曰成樂故屬定襄也魏土地記曰雲中城東八十里有成樂城今雲中郡治一名石盧城也白渠水又西逕魏雲中宮南魏土地記曰雲中宮在雲中故城東四十里白渠水又西南逕雲中故城南故趙地虞氏記云趙侯自五原河曲築長城東至陰山又於河西造大城一箱崩不就乃改卜陰山河曲而禱焉晝見群鵠遊於雲中裴回經日見大光在其下武侯曰此爲我乎乃即於其處築城今雲中城是也秦始皇十三年立雲中郡縣曰遠服矣白渠水又西北逕沙陵縣故城南王莽之希恩縣也

其水西注沙陵湖又有芒于水出塞外南逕鍾山山
即陰山故郎中侯應言於漢曰陰山東西千餘里單
于之苑囿也自孝武出師攘之於漠北匈奴失陰山
過之未嘗不哭謂此山也其水西南逕武臯縣王莽
之永武也又南逕原陽縣故城西又西南與武泉水
合其水東出武泉縣之故城西南縣即王莽之所謂
順泉者也水南流又西屈逕北輿縣故城南按地理
志曰五原有南輿縣王莽之南利也故此加北舊中
部都尉治十三州志曰廣陵有輿故此加北疑太疎
遠也其水又西南入芒于水西南逕白道南谷口有
長城在右側帶長城背山面澤謂之白道南谷口有

城自城北出有高阪謂之白道嶺沿路惟土穴出泉
挹之不窮余每讀琴操見琴慎相和雅歌錄云飲馬
長城窟及其坂陟斯途遠懷古事始知信矣非虛言
也顧瞻左右山樹之上有垣若頽基焉沿谿亘嶺東
西無極疑趙武靈王之所築也芒于水又南西逕雲
中城北白道中谿水注之水發源武川北塞中其水
南流逕武川鎮城以景明中築以禦北狄矣其水西
南流歷谷逕魏帝行宮東世謂之阿計頭殿宮城在
白道嶺北阜上其城員角而不方四門列觀城內唯
臺殿而已其水又西南歷中谿出山西南流於雲中
城北於雲中城北南注芒于水芒于又西塞水出懷

朔鎮東北芒中南流逕廣德殿西山下余以太和十
八年從高祖北巡屆於陰山之講武臺臺之東有高
祖講武碑碑文是中書郎高聰之詞也自臺西出南
上山山無樹木唯童阜耳即廣德殿所在也其殿四
柱兩厦堂宇綺拱圖畫奇禽異獸之象殿之西北便
得焜煌堂雕楹鏤桷取狀古之温室也其時帝幸龍
荒遊鸞朔北南秦王仇池楊難當捨蕃委誠重譯拜
闕陛見之所也故殿以廣德爲名魏太平真君三年
刻石樹碑勒宣時事碑頌云肅清帝道振攝四荒有
蠻有戎自彼氐羌無思不服重譯稽顙恂恂南秦斂
斂推亡峨峨廣德奕奕焜煌侍中司徒東郡公崔浩

之詞也碑陰題宣成公李孝伯尚書盧遐等從臣姓名若新鏤焉其水歷谷南出陰山西南入芒于水芒于水又西南注沙陵湖湖水西南入於河

河水南入楨陵縣西北

緣胡山歷沙南縣東北兩山二縣之間而出余以太和中爲尚書郎從高祖北巡親所逕涉縣在山南王莽之楨陸也北去雲中城一百二十里縣南六十許里有東西大山山西枕河河水南流脈水尋經殊乖川去之次似非關究也

又南過赤城東又南過定襄桐過縣西

定襄郡漢高六年置王莽之得降也桐過縣王莽更

名椅桐者也

河水於二縣之間濟有君子之名

昔漢桓帝十三年西幸榆中東行代地洛陽大賈齎金貨隨帝後行夜迷失道往投津長曰子封送之渡河賈人卒死津長葬之其子尋求父器發冢舉尸資費一無所損其子悉以金與之津長不受事聞於帝曰君子也即名其津為君子濟濟在雲中城西南二百餘里

河水又東南左合一水

水出契吳東山西逕故里南而北俗謂之契吳亭其水又西流注於河

河水又南樹頽水注之

水出東山西南流右合中陵川水水出中陵縣東南山下北俗謂之大浴山其水亦取名焉東北流逕中陵縣故城東北俗謂之北右突城王莽之遮害也十三州志曰善無縣南七十五里有中陵縣世祖建武二十五年置其水又西北右合一水水出東山北俗謂之貸敢山水又受名焉其水自西北流注於中陵水又西北流逕善無縣故城西王莽之陰館也十三州志曰舊定襄郡治地理志曰鴈門郡治其水又西北流又會一水水出東山下北俗謂之吐文水山又取名焉北流逕鉏亭南西流土壁亭南西出峽左入

中陵水水又北分爲二水一水東北流謂之流水又東逕沃陽縣故城南北俗謂之可不塗城王莽之敬陽也又東北逕沃陽城東又東合可不塗水出東南六十里山下西北流注沃水又會東逕參合縣南魏因參合陁以即名也北俗謂之倉鶴陁道出其中亦謂之參合口徑在縣之西北即燕書所謂太子寶自河還師參合三軍奔潰即是處也魏立縣以隸涼城郡也西去沃陽縣故城二十里縣北十里有都尉城地理志曰沃陽縣西部都尉治者也北俗謂之阿養城其水又東合一水水出縣東南六十里山下北俗謂之災豆渾水西北流注於沃水又東北流注鹽池

地理志曰鹽澤在東北者也今鹽池西南去沃陽故城六十五里池水澱滯淵而不流東西三十里南北二十里池北十里即涼城郡注池西有舊城俗謂之涼城也郡取名焉地理志曰澤有長丞此城即長丞所治也城西三里有小阜阜下有泉東南流注池北俗謂之大谷此佳水亦受目焉中陵川水自枝津西北流右合一水於連嶺北出沃陽縣東北山下北俗名之烏伏真山水曰誥升袁河西南流逕沃陽縣左合中陵川亂流西南與一水合北俗謂之樹頹水水出東山下西南流右合誥升袁水亂流西南注分爲二水左水枝分南出北俗謂之太羅河右水西逕故

城南北俗名之昆新城其水自城西南流注於河
河水又南太羅水注之

水源上承樹頽河南流西轉逕武縣故城南十三州
志曰武縣在善無西百五十里北俗謂之太羅城水
亦藉稱焉其水西南流右水注之水導故城西北五
十里南流逕城西北名之曰故槃迴城又南流注太
羅河太羅河又西南流注於河

河水又左得湍水口

水出西河郡美稷縣東南流東觀記曰郭伋細侯爲
并州牧前在州素有恩德老小相攜道路行部到西
河美稷數百小兒各騎竹馬迎拜汲問兒曹何自遠

來曰聞使君到喜故迎伋謝而發去諸兒復送郭外
問使君何日還伋計日告之及還先期一日念小兒
即止野亭須期至乃往其水又東南流羌人因水以
氏之漢沖帝時羌湍狐奴歸化蓋其渠帥也其水俗
亦謂之爲湍波水東南流入長城東鹹水出長城西
鹹谷東入湍水又東南渾波水出西北窮谷東南流
注於湍水湍水又東逕西河富昌縣故城南王莽之
富成也湍水又東流入於湍水左合一水出善無縣
故城西南八十里其水西流歷於呂梁之山而爲呂
梁洪其巖層岫衍澗曲崖深巨石崇竦壁立千仞河
流激盪濤涌波襄雷濟雲洩震天動地昔呂梁未闢

河出孟門之上蓋大禹所闢以通河也司馬彪曰呂
梁在離石縣西今於縣西歷山尋河乃無過峘當作
過岨
至是乃為河之巨嶮即呂梁矣在離石北以東可二
百有餘里

又南過西河園

音陽縣東

西河郡漢武帝元朔四年置王莽改曰歸新園水出
上郡白土縣園谷東逕其縣南地理志曰園水出西
東入河王莽更曰黃土也東至長城與神御水合水
出縣南御山峽山東出至長城入於園園水又東逕
鴻門縣故鴻門亭地理風俗記曰園陰縣西五十
里有鴻門亭天封宛火井廟火從地中出園水又東

梁水注之水出西北梁谷東南流注圃水又東逕圃
陰縣北漢惠帝五年立王莽改曰方陰矣又東桑谷
水注之水出西北桑谿東北桑谿東北流入於圃圃
水又東逕圃陰南東流注於河

河水又東端水入焉

水西出號山山海經曰其山木多漆椶其草多芎窮

是多冷石

經作冷石郭注音金云未詳

端水出焉而東流注於河

河水又南諸次之水入焉

水出上郡諸次山山海經曰諸次之山諸次水出是
山多木無草鳥獸莫居是多衆蛇其水東逕榆林塞
世又謂之榆林山即漢書所謂榆谿舊塞者也自谿

西去悉榆林之藪矣緣歷沙陵屈龜茲縣西出故謂
廣長榆也王恢云樹榆為塞謂此矣蘇林以為榆中
在上郡非也按始皇本紀西北逐匈奴自榆中並河
以東屬之陰山然榆中在金城東五十許里陰山在
朔方東以此推之不得在上郡漢書音義蘇林為是
失也其水東入長城小榆林水合焉歷源古本作澗西北
窮谷其源也又東合首積水西出首積谿谿東注諸
次水又東入於河山海經曰諸次之水東流注於河
即此水也

河水又南湯水注之

山海經曰水出上申之山上無草木而多礫石下多

榛梧湯水出焉東流注於河也

又南離石縣西奢延水注之

水西出奢延縣西南赤沙阜東北流山海經曰所謂生水出孟山者也郭景純曰孟或作明漢破羌將軍段熲破羌於奢延澤虜走洛川洛川在南俗因縣土謂之奢延水又謂之朔水矣東北流逕其縣故城南王莽之奢節也赫連龍升七年於是水之北黑水之南遣將作大匠梁公叱於阿黎改築大城名曰統萬城蒸土加功雉堞雖久崇墉若新并造五兵器銳精利乃咸百鍊爲龍雀大鑲號曰大夏龍雀銘其背曰古之利器吳楚湛盧大夏龍雀名冠神都可以懷遠

水經卷三
十四 四三十三
可以柔逋如風靡草威服九區世甚珍之又鑄銅爲
大鼓及飛廉翁仲銅駝龍虎皆以黃金飾之列於宮
殿之前則今夏州治也奢延水又東北與溫泉合源
西北出沙谿而東南流注奢延水奢延水又東黑水
入焉出奢延縣黑澗東南歷沙陵注奢延水奢延水
又東合交蘭水出龜茲交蘭谷東南流注奢延水奢
延水又東北流與鏡波水合水源出南邪山南谷東
北流注於奢延水奢延水又東逕膚施縣帝原水西
北出龜茲縣東南流縣因處龜茲降胡著稱又東南
注奢延水又逕膚施縣南秦昭王三年置上郡治漢
高祖并三秦復以爲郡王莽以漢馬員爲增山連率

歸世祖以爲上郡太守司馬彪曰增山者上郡之別

名也東入五龍山地理志曰縣有五龍山也帝原水

自下亦爲通稱也歷長城東出於赤翟白翟之中又

有年宋本作平水出西北平谿東南入奢延水又東走馬

水注之水出西南長城北陽周縣故城南橋山昔二

世賜蒙恬死於此王莽更名上陵時山上有黃帝冢

故也帝崩唯弓劍存焉故世稱黃帝仙矣其水東流

昔段熲追羌出橋門至走馬水聞羌在奢延澤即此

處也門即橋山之長城門也始皇令太子扶蘇與蒙

恬築長城起自臨洮至於碣石即是城也其水東北

流入長城又東北注奢延水又東與白羊水合其水

出於西南白羊谿巡谿東北注於奢延水奢延水又東入於河山海經曰生水東流注於河

河水又南陵水注之

水出陵川北谿南逕其川西轉入河

河水又南得離石水口

離石北山南流逕離石縣故城西史記云秦昭王伐趙取離石者也漢武帝元朔三年封代共王子劉綰為侯國後漢西河郡治也其水又南出西轉逕隰城縣故城南漢武帝元朔三年封代共王子劉忠為侯國王莽之慈平亭也胡俗語譌尚有千城之稱其水西流注於河也

又南過中陽縣西

中南縣故城在東東翼汾水隔越重山不濱於河也
又南過土軍縣西

吐京郡治故城即土軍縣之故城也胡漢譯言皆譌
僞變矣其城員長而不方漢高帝十一年以封武侯
宣義為侯國縣有龍泉出城東南道左山下牧馬川
上多產名駒駿同滇池元馬河其水西北流至其城
東南土軍水出道左高山西南注之龍泉水又北屈
逕其城東西北入於河

河水又南合契水

芴谿東入窮谷其源也又南至祿谷水口水源東窮

此谿也

河水又南得大蛇水

發源谿首西流入河

河水又南又納辱水

宋本作河水
又右納辱水

山海經曰辱水出於鳥山其上多桑其下多楮陰多

鐵陽多玉其水東流注於河俗謂之秀延水東流得

浣水口芻谿西轉窮谿便即浣水之源也延水又東

會於根水西南谿下根水所發而東北注延水東南

露跳水西出露谿東流又東北入延水亂流注於河

河水又南左合信支水水發源東露西流入於河河

水又南左會石羊水巡谿東入道源窮谷西流注入

河

又南過上郡高奴縣東

域谷水東啓荒源西歷長谿西南入於河水又南合谿口水出孔山南歷谿西流注於河孔山之上有一穴如車輪三所東西相當相去各二丈許南北直通故謂之孔山也山在蒲城西南三十餘里河水又右會區水山海經曰次四經之首曰陰山西北百七十里曰申山其上多穀柞其下多柎檀多金玉區水出焉而東流注於河世謂之清水上郡東流入於長城逕老人山下又東北流至老人谷旁水北出極谿便得水源清水又東得龍尾水口水出北地神泉鄯北山

龍尾谿東北流注清水又東會三湖水水出南山三湖谷東北流入清水清水又東逕高奴縣合豐林水地理志謂之洧水也故言高奴縣有洧水肥可難水上有肥可接取用之博物志稱酒泉延壽縣南山出泉水大如筥注地爲溝水有肥如肉汁取著器中始黃後黑如凝膏然極明與膏無異膏車及水碓缸甚佳彼方人謂之石漆水肥亦所在有之非止高奴縣洧水也項羽以封董翳爲翟王居之三秦此其一也漢高祖破以縣之王莽之利平矣民俗語譌謂之高樓城也豐林川長津瀉注北流會洧洧水又有谿谷水注之水西出奚川東南流入洧水又東注於河

河水又南蒲川石樓山南逕蒲城東

即重耳所奔之處也又南歷蒲子縣故城西今大魏之汾州治徐廣晉紀稱劉淵自離石南移蒲子者也闕駟曰蒲城在西北漢武帝置其水南出得黃盧水口東出歷蒲子城南東北入谷極谿便水之源也又南合紫川水水出東北出紫川谷西南合江水江水出江谷西北入紫水紫水又西北入蒲水蒲水又西南入於河水河水入南黑水水出定陽縣西山二源奇發同瀉一壑東南流逕其縣北又東南流右合定水俗謂之白水也水西出其縣南山定水谷更逕定陽縣故城南應劭曰縣在定水之陽也定水又東注

於黑水亂流東南入於河

三水之類也

水出山曰白水

水出山曰黑水

水出山曰黃水

水出山曰赤水

水出山曰青水

水出山曰白水

水出山曰黑水

水出山曰黃水

水出山曰赤水

水經卷三

水經卷四

漢桑欽撰

後魏酈道元注

河水四

河水又南過河東北屈縣西

河水南逕北屈縣故城西十里有風山上有穴如輪
風氣蕭瑟習常不止當其衝飄也而略無生草蓋不
定衆風之門故也風山西四十里河南孟門山山海
經曰孟門之山其上多金玉其下多黃堊石淮南
子曰龍門未闢呂梁未鑿河出孟門之上大溢逆流
無有丘陵高阜滅之名曰洪水大禹疏通謂之孟門
故穆天子傳曰北登孟門九河之磴孟門即龍門之

上口也實謂黃河之巨阨兼孟津之名矣此石經始
禹鑿河中漱廣夾岸崇溪傾崖返捍巨石臨危若墜
復何古之人有言水非石鑿而能入石信哉其中水
流交衝素氣雲浮往來遙觀者常若霧露沾人窺溪
悸魂其水尚崩浪萬尋縣流千丈渾洪轟怒鼓若山
騰濬波頽疊迄於下口方知慎子下龍門流浮竹非
駟馬之追也又有燕完水注之異源合舍西流注河
河水又南得鯉魚

歷澗東入窮溪首便其源也爾雅曰鱣鮪也出鞏穴
三月則上渡龍門得渡爲龍矣否則點額而還非夫
往還之會何能便有茲稱乎

河水又南羊求水入焉

東出羊求川西逕北屈縣故城南城則夸吾所奔邑也王莽之朕北也汲郡古文曰翟章救鄭次于南屈應劭曰有南故加北國語曰二五言於獻公曰蒲與二屈君之疆也其水西流注于河

河水又南爲採桑津

春秋僖公八年晉里克敗狄于採桑是也

又南過皮氏縣西

赤水出西北罷谷川東謂之赤石川東入于河

河水又南合蒲水

西則兩源並發俱導一山出西河陰山縣王莽之山

寧也陰山東麓南水東北與長松水合水出西三陽
山東東北流左入蒲水蒲水又東北與北谿會同爲
一川東北注河

河水又南逕丹水西南

丹陽山東北逕冶東俗謂之丹陽城城之左右猶有

遺銅矣

漢書食貨志注云金有三品丹陽銅爲赤金
神異經云丹陽銅似金可燃以作錯塗之器

其水東北會白水口水出丹山東而西北注之丹水

又東東北入河

河水又南黑水注之

西出丹山東而東北入于河

河水又南至嶧谷旁

東北窮澗水源所導也西南流注于河

河水又南洛水自獵山枝分東派東南注於河

大河一作

昔魏文侯築館洛陰指謂是水也皮氏縣王莽之延平也故城在龍門東南不得延逕皮氏方屈龍門也又南出龍門口汾水從東來注之

昔者大禹導河積石疏浚梁山謂斯處也即經所謂龍門矣魏土地記曰梁山北有龍門山大禹所鑿通孟津河口廣八十步巖際鑄跡遺功尚存岸上并有廟祠祠前有石碑三所二碑文字紊滅不可復識一

碑是太和中立竹書紀年晉昭公元年河水赤於龍門三里梁惠成王四年河水赤於龍門三日京房易

妖占曰河水赤下民恨

河水又南右合暘谷水

水自谿東南流逕夏陽縣西北東南注於河

河水又南逕梁山原東

自原山東南出至河晉之望也在馮翊夏陽縣之西
臨於河上山崩壅河三日不流晉侯以此問伯宗即
是處也春秋穀梁傳曰成公五年梁山崩遏河水三
日不流召伯尊遇輦者不避使車右鞭之輦者曰所
以鞭我者其取道遠矣伯尊因問之輦者曰君親縞
素率羣臣哭之斯流矣如其言而河流

伯尊即伯宗
聲相轉也

河水又南嶠谷水注之

水出縣西北梁山東南流橫谿注之水出於三累山
其山層密三成故俗以三累名山按爾雅山三成爲
崑丘斯山豈亦崑丘乎山水際有二石室蓋隱者
之故居矣細水東流注於嵒谷側谿山南有石室西
面有兩石室北面有二石室皆因阿結牖連扃接闔
所謂石室相距也東廂石上猶傳杵臼之跡庭中亦
有舊宇處尚髣髴前基北坎室上有微涓石溜豐周
瓢飲似是棲遊隱學之所昔子夏教西河疑即此也
而無辨之谿水又東南逕夏陽縣故城北故少梁也
秦惠文王十一年更從今名矣王莽之冀亭也其水

東南流

疑脫
注字

於河昔韓信之襲魏王豹也以木罌自

水經卷四
四十六
此渡

河水又南右合陶渠水

水出西北梁山東南流逕漢陽太守殷濟精廬南

舊本

作精廬尚宋本作尚在此脫
一在字吳本改爲南似誤

俗謂之子夏廟河水又

南逕高門南蓋層阜墮鼓故流東門之稱矣又東南

逕華池南池方三百六十步在夏陽城西北四里許

故司馬遷碑文云高門華池在茲夏陽西城北漢陽

太守殷濟精舍四里所今高門東去華池三里谿水

又東南逕夏陽縣故城南服虔曰夏陽號邑也在太

陽東三十里城南

春秋僖公二年虞師晉師滅下陽
杜元凱云下陽號邑在河東大陽

縣按漢志弘農陝縣注故虢國在大陽東馮翊夏陽
縣注故少梁龍門在北則下陽夏陽兩地也公羊傳

下陽作夏陽服因誤矣

又歷高陽宮北又東南逕司馬子長墓

北墓前有廟廟前有碑永嘉四年漢陽太守殷濟瞻

仰遺文大其功德遂建石室立碑樹柏太史公自敘

曰遷生於龍門是其墳墟所在矣谿水東南流入河

昔魏文侯與吳起浮河而下美河山之固即於此也

河水又西徐水注之

水出西北梁山東南流逕漢武帝登仙宮東東南流

絕疆梁石逕劉仲城北是漢祖兄劉仲之封邑也故

徐廣史記音義曰郃陽國名也高祖八年侯劉仲是

也郃陽當作郃陽按史記高祖紀代王劉仲棄國亡

自歸雒陽廢以為合陽侯索隱曰合陽屬馮翊正

義曰在郃水之陽也其水東南逕子夏陵北東入河

河水又南逕子夏石室

東南北有二石室臨側河崖即子夏廟室也

又南過汾陰縣西

河水東際汾陰睢縣故城在睢側漢高帝六年封周昌為侯國魏土地記曰河東郡北八十里有汾陰城北去汾水三里城西北隅曰睢丘上有后土祠封禪書曰元鼎四年始立后土祠於汾陰睢丘是也又有萬歲宮漢宣帝神爵元年幸萬歲宮東濟大河而神魚舞水矣昔趙簡子沈纒激於此曰吾好聲色而是子致之吾好士六年不進一人是過而黜吾善君子

以為能謹矣

呂氏春秋作樂徽云是長吾過而黜吾善也

河水又逕郃陽城東

周威烈王之十七年魏文侯伐秦至鄭還築汾陰郃縣即此城也故有莘邑矣為太姒之國詩云在郃之陽在渭之涘又曰纘汝維莘長子維行謂此也城北在北瀆水南去二水各數里其水東逕其城內東入於河又於城南側中有瀆水東南出城注於河城南又有瀆水東流東注於河水南猶有文母廟前有碑去城一十五里水即郃水也縣取名焉故應劭曰在郃水之陽也河水又南瀆水入焉水出汾陰縣南四十里西去河三里平地開源瀆當作泉上涌大幾如輪浚則不測俗呼之為瀆魁

郭璞爾雅注云汾陰有水口如車輪許瀆沸涌

出其漢無限
名之為漢

古人壅其流以為陂水種稻東西二百

步南北一百餘步與郟陽漢水夾河中渚上又有一
漢水皆相潛通故呂忱曰爾雅異出同流為漢水其
水西南流歷蒲阪西西流注於河

河水又南逕陶城西

舜陶河濱皇甫士安以為定陶不在此也然陶城在
蒲阪城北城即舜所都也南去歷山不遠或畊或陶
所在則可何必定陶方得為陶也舜之陶也斯或一
焉孟津有陶河之稱蓋從此始之南對蒲津關汲冢
竹書紀年魏襄王七年秦王來見於蒲阪關四月越
王使公師隅來獻乘舟始罔及舟三百箭五百萬犀

角象齒焉

又南過蒲阪縣西

地理志曰縣故蒲也王莽更名蒲城應劭曰秦始皇
東巡見有長阪故加阪也孟康曰晉文公以賂秦秦
人還蒲於魏魏人喜曰蒲反矣故曰蒲反也僻瓚注
漢書曰秦世家以垣爲蒲反然則本非蒲也皇甫謐
曰舜所都也或言蒲阪或言平陽及瀼者也今城中
有舜廟魏秦州刺史治太平遷都罷州置河東郡郡
多流離謂之徙民民有姓劉名墮者宿擅工釀採挹
河流醞成芳酎縣食同枯枝之年排於桑落之辰

縣食

二語字有脫誤按洛陽伽藍記云河東人劉白墮善釀酒六月中以罌貯酒曝日中經旬酒味不動飲之

香美朝貴千里相餉命曰鶴觴齊民要術云十月桑
落初凍則收水釀者爲上時春酒正月晦日收水爲

中時春酒故酒得其名矣然香醕之色清白若滄漿焉別

調氛氲不與佗同蘭薰麝越自成馨逸方土之貢選

最佳酌矣自王公庶友牽拂相招者每云索郎有顧

思同旅語索郎反語爲桑落也更爲籍徵之雋句中

書之英談郡南有歷山也謂之歷觀舜所畊處也有

舜井媯汭二水出焉南曰媯水北曰汭水迺歷山

下上有舜廟周處風土記曰舊說舜葬上虞又記云

畊於歷山而始寧剡二縣界上舜所畊田於山下多

柞樹吳越之閒名柞爲櫪故曰歷山余按周處此志

爲不近情傳疑則可證實非矣安可假木異名附山

殊稱彊引大舜即比寧懷

寧字誤當作甯懷括地志云河內郡獲嘉縣有甯城

而懷縣亦屬河內又媯州懷戎縣西有舜井路史國名記云陽處父聘衛過甯一作寧

更爲失

志記之本體差實錄之常經矣歷山媯汭言是則安於彼乖矣尚書所謂釐降二女於媯汭也孔安國曰居媯水之內王肅曰媯汭虞地名皇甫謐曰納二女於媯水之汭馬季長曰水所出曰汭然則汭似非水名而今見有二水異源同歸渾流西注入於河

河水又南逕雷首山西

山臨大河北去蒲阪三十里尚書所謂壺口雷首者

俗亦謂之堯山山上有故城世又曰堯城闕駟曰蒲

阪堯都按地理志曰縣有堯山有祠雷首山在南事

有似而非非而似千載眇藐非所詳耳

又南涑水注之

水出河北縣雷首山縣北與蒲阪分山有夸齊廟闕
駟十三州志曰山一名獨頭山夸齊所隱也山南有
古冢陵柏蔚然攢茂丘阜俗謂之夸齊墓其水也西
南流亦曰雷水穆天子傳曰壬戌天子至於雷首犬
戎胡觴天子於雷首之阿乃獻良馬四六天子使孔
牙受之於雷水之干是也昔趙盾田首山食祁左傳作提
彌明翳桑之下即於此也涑水又西南流注於河春
秋左傳謂之涑川者也俗謂之陽安澗水

又南至華陰潼關渭水從西來注之

汲冢竹書紀年曰晉惠公十五年秦穆公帥師送公
子重耳涉自河曲春秋左氏僖公二十四年秦伯納
之及河子犯以璧授公子曰臣負羈紲從君巡於天
下臣之罪多矣臣猶知之而况君乎請由此亡公子
曰所不與舅氏同心者有如白水授璧於此子推哭
曰天開公子子犯以為功吾不忍與同位遂逃焉

河水歷船司空與渭水會

漢書地理志曰舊京兆郡之屬縣也左丘明國語云
華岳本一山當河河水過而曲行河神巨靈手盪脚
蹋開而為兩今掌足之跡仍存華巖

按巨靈事在辭
綜西京賦注引

古語云云非
左氏國語也

開山圖曰有巨靈胡者偏得神元之道

能造山川出河所謂巨靈顛顛首冠靈山者也常有好事之人故升華岳而觀厥跡焉自下廟歷列柏南行十一里東迴三里至中祠又西南出五里至南祠謂之北君祠諸欲升山者至此皆祈請焉從北南入谷七里又居一祠謂之石養父母石龕木主存焉入

疑作

南出一里至天井井裁容人穴空迂迴傾曲而

上可高六丈餘山上又有微涓細水流入井中亦不甚沾人上者皆所由陟更無別路欲出井望空視明如在室窺窗也出井東南行二里峻阪斗上斗下降此阪二里許又復東上百丈崖升降皆須扳繩挽葛而行矣南上四里路到石壁緣旁稍進逕一百餘步

自此西南出六里又至一神名曰胡趨寺

郭緣生述
征記神作

祠趨
作越

神象有童子之容從祠南歷夾嶺廣裁三尺餘

兩箱

宋本有
縣字

崖數萬仞窺不見底祀祠有感則雲與

之平也然後敢度猶須騎嶺抽身漸以就進故世謂

斯嶺為搦嶺矣度此二里復屈山頂上方七里靈泉

二所一名蒲池西流注於澗一名太上泉東注澗下

上宮神廟近東北隅其中塞實雜物事難詳載自上

宮東北出四百五十步有屈嶺東南望巨靈手跡唯

見洪崖赤壁而已都無山下上觀之分均矣河在關

內南流潼激關山因謂之潼關灌水注之水出松果

之上北流逕通谷世亦謂之通谷水東北注於河述

征記所謂潼谷水者也或說因水以名地也河水自潼關東北流水側有長阪謂之黃卷阪秀絕澗陟此阪以升潼關所謂泝黃卷以濟潼關矣歷北出東崐通謂之函谷關也邃岸天高空谷幽深澗道之峽車不方軌號曰天嶮故西京賦曰巖嶮周固襟帶易守所謂秦得百二并吞諸侯也是以王元說隗囂曰請以一丸泥東封函谷關圖王不成其弊足霸矣郭緣生記曰漢末之亂魏武征韓遂馬超連兵此地今際河之西有曹公壘道東原上云李典營義熙十三年王師曾據此壘西征記曰公路逶迤入函道六里舊城城周百餘步北臨大河南對高山姚氏置關以守

峽宋武王入長安檀道濟王鎮惡或據山為營或平
城結壘為大小七營濱帶河嶮姚氏亦保據山原阜
之上尚傳故跡矣關之直北隔河有層阜魏狀獨秀
孤峙河陽世謂之風陵戴延之之所謂風埽者也風埽
御覽作風堆又引戴延之西征記云伏羲女媧風姓
也此當是女媧之墓九域志云女媧墓在今潼關口
河灘上屹狀介河有木數株雖暴漲不漂沒南則河
也寰宇記云河東縣三里風陵是女媧之墓

濱姚氏之營與晉對岸

河水又東北玉澗水注之

水南出玉谿北流逕皇天原西周固記開山東首上
平博方可里餘三面壁立高千許仞漢世祭天於其
上名之為皇天原上有漢武帝思子臺又北逕闕鄉

城西郡國志曰弘農湖縣有閿鄉世謂之閿鄉水也
魏尚書僕射閿鄉侯河東衛伯儒之故邑其水北流
注於河

河水又東逕閿鄉侯河東與全鳩澗水合

侯河當
作城南

水出南山北逕皇天原東述征記曰全節地名也

圖經

云全節即漢書全
鳩里戾太子死處

其西名桃原古之桃林周武王克

殷休牛之地矣西征賦曰咸徵名於桃園者也晉太
康地記曰桃林在閿鄉南谷中其水入北河注於河

北河疑作河北
蓋謂河北縣也

又東過河北縣南

縣與湖縣分河蓼水出襄山蓼谷西南流於河

河水又東永樂澗水注之

水北出於薄山南流逕河北縣故城西故魏國也晉
獻公滅魏以封畢萬卜偃曰魏大名也萬後其昌乎
後乃縣之在河之北故曰河北縣也今城南西二面
並去大河可二十餘里北去首山一十許里處河山
之間土地迫隘故魏風著十畝之詩也城內有龍泉
南流出城又南斷而不流永樂谿水又南入於河余
按中經即渠豬之水也太史公封禪書稱華山以西
名山七薄山有其一焉薄山即襄山也徐廣曰蒲阪
縣有襄山山海經曰蒲山之首曰甘桑之山

今山海經作甘

棗之山括地志云蒲州河東縣雷首山一名中條山一名歷山亦名首陽山亦名蒲山一名襄山亦名甘

棗山亦名豬山共水出焉而西流注於河東則渠豬之山渠

豬之水出焉而南流注於河如準封禪書二水無西南流河之理今診蓼水川流所趣與共水相扶水樂谿水導源注於河又與渠豬勢合蒲山統目總稱亦與襄山不殊故揚雄河東賦曰河靈攬踢掌華蹈襄注云襄山在潼關北十餘里以是推之知襄山在蒲阪蓼水即渠豬之水也

河水自河北城南東逕芮城

二城之中有段干木冢干木晉之賢人也魏文侯過其門軾其廬所謂德尊萬古芳越來今矣汲冢竹書紀年曰晉武公元年尚一軍芮人乘京荀人董伯皆

叛匪直大荔故芮也此亦有焉紀年又云晉武公七年芮伯萬之母芮姜逐萬萬出奔魏八年周師虢師圖魏今竹書作圍魏取芮伯萬而東之九年戎人逆芮伯萬於邾斯城亦或伯萬之故畫也

河水又會槃澗

水出湖縣夸父山北逕漢武帝思子宮歸來望子臺東又北流入於河

河水又東逕湖縣故城北

昔范叔入關遇穰侯於此矣湖水出桃林塞之夸父山廣員三百仞武王伐紂天下既定王及岳濱放馬華陽散牛桃林即此處也其中多野馬造父於此得

驛騶綠耳盜驪之乘以獻周穆王使之馭以見西王
母湖水又北逕湖縣東而北流入於河魏土地記曰
弘農湖縣有軒轅黃帝登仙處黃帝採首山之銅鑄
鼎於荆山之下有龍垂胡於鼎黃帝登龍從登者七
十人遂升於天故名其地爲鼎湖荆山在馮翊首山
在蒲阪與湖縣相連晉書地道記太康記並言胡縣
也漢武帝改作湖俗云黃帝自此乘龍上天也地理
志曰京兆湖縣有周天子祠二所故曰湖不言黃帝
升龍也山海經曰西九十里曰夸父之山其木多椶
柎多竹箭其陽多玉其陰多鐵其北有林焉名曰桃
林其中多馬湖水出焉北流注於河故三秦記曰桃

林塞在長安東四百里若有軍馬經過好行則牧華山休息林下惡行則洩河漫延人馬不得過矣

河水又東合柏谷水

水出弘農縣兩石隄山山下有石隄祠銘云魏甘露四年散騎常侍征南將軍豫州刺史領弘農太守南平公之所經建也其水北流逕其亭下昔公子重耳出亡及柏谷卜適齊楚狐偃曰不如之翟漢武帝嘗微行此亭見餽亭長妻故潘岳西征賦曰長徵客於柏谷

微客賦作傲賓

妻覩貌而獻餐謂此亭也谷水又北流

入於河

河水又東右合門水

水經卷四
門水即洛水之枝流者也洛水自上洛縣東北於拒
城之西北分爲二水枝渠東北出爲門水也門水又
東北歷陽華之山即華陽山海經所謂陽華之山門
一水出焉者也又東北歷峽謂之鴻關水東有城即關
亭也水西有堡謂之鴻關鳥世亦謂之劉項裂地處
非也余按上洛有鴻臚圍池是水津渠沿注故謂斯
川爲鴻臚澗鴻關之名乃起是矣門水又東北歷邑
川燭水注之左水出於陽華之陽東北流逕盛牆亭
西東北流與右水合右水出陽華之陰東北流逕盛
牆亭東北與左水合即山海經所謂緒茹之水出於
陽華之陰東北流注於門水者也又東北燭水注之

水有二源左水南出於衡嶺世謂之石城山其水東
北流逕石城西東北合右水右水出石城山東北逕
石城東東北入左水地理志曰燭水出衡嶺下谷開
山圖曰衡山在函谷山西南是水亂流東注於緒茹
之水二水悉得通稱矣歷澗東北出謂之開方口水
側有阜名之方伯堆宋奮武將軍魯方平建威將軍
薛安都等與建威將軍柳元景北入軍次方伯堆者
也堆上有城即方伯所築也又東北逕邑川城南即
漢封竇門之故邑川受其名亦曰竇門城在函谷關
南七里又東北田渠川水注之出衡山之白石谷東
北流逕故丘亭東是薛安都軍所從城也其水又逕

鹿蹠山西山石之上有鹿蹠自然成者非人功所刊
歷田渠川謂之田渠水西北流注於燭水燭水又北
入門水水之左右即函谷山也門水又北逕弘農縣
故城東城即故函谷關校尉舊治處也終軍棄繻於
此燕丹孟嘗亦義動雞鳴於其下可謂深心有感志
誠難奪矣昔老子西入關尹喜望氣於此也故趙至
與嵇茂齊書曰李叟入秦及關而歎亦言與嵇叔夜
書及關尹望氣之所異說紛紛竝未知所定矣漢武
帝元鼎四年徙關於新安縣以故關爲弘農縣弘農
郡治王莽更名右隊劉桓公爲郡虎相隨渡河光武
聞而善之其水側城北流而注於河河水於此有涇

津之名說者咸云漢武微行柏谷遇辱竇門又感其妻深識之饋既返玉階厚賞賚焉賜以河津令其鬻渡今竇津者是也故潘岳西征賦酬匹婦其已泰胡厥夫之謬官袁豹之徒竝以爲然余按河之南畔夾側水濱有測一作潤或作津謂之涇津河北縣有涇水涇津其水南入於河河水故有涇津之名不從門始蓋事類名同故作者是之竹書穆天子傳曰天子自寘軫乃次於涇水之陽丁亥入於南鄭考其浴歷所鍾路直斯津以是推之知非因門矣俗或謂之偃鄉澗水也河水又有左右一水其水三源疏引俱導薄水南

流會成一川其三水之內世謂之閒原言虞芮所爭

之田所未詳矣又南注於河河水右會水注之水出
南山北逕曹陽亭西陳涉遣周章入秦少府章邯斬
之於此魏氏以爲好陽晉書地道記曰亭在弘農縣
東十三里其水西北流入於河河水又東蓄水注之
水出常烝之山西北逕曲沃城南又屈逕其城西西
北入河諸注述者咸言曲沃在北此非也魏司徒崔
浩以爲曲沃地名也余按春秋文公十三年晉侯使
詹嘉守桃林之塞處此以備秦時以曲沃之官守之
故曲沃之名遂爲積古之傳矣河水又東得七里澗
澗在陝西七里故因名焉谷水自南山通河亦謂之
曹陽坑是以潘岳西征賦曰行於漫瀆之口憩於曹

陽之墟袁豹崔浩亦不菲其地矣余按漢書昔獻帝東遷逼以寇難李傕郭汜追戰於弘農澗天子遂露次曹陽楊奉董承外與傕和內引白波李樂等破傕乘輿於是得進復來戰奉等大敗兵相連綴四十餘里方得達陝以是推之似非曹陽然以山海經曰求之菑曹字相類是或有曹陽之名也河水東合譙譙水導源常烝之山俗謂之于山蓋先後之異名也山在陝城南八十里其川流也二源雙導同注一壑而西北流注於河

又東過陝縣北

橐水出橐山西北流又有于水出南山北合逕崖峽

水經卷四
北流與于山之水會出于山東谷兩川合注於崖水
又東北注橐水北流出谷謂之漫澗矣與安陽谿水
合水出石嶠南西逕安陽城南漢武帝封上官桀為
侯國也潘岳所謂我祖安陽也東合漫澗水北有逆
旅亭謂之漫口客舍也

又西逕陝縣故城南

又合一水謂之瀆谷水南出近溪北流注橐其水又
西北逕陝城西西北入於河河北對茅城故茅亭茅
戎邑也公羊曰晉敗之一作入大陽者也津亦取名焉

春秋文公三年秦伯伐晉自茅津濟封嶠尸而還是
也東則咸陽澗水注之水出北虞山南至陝津注河

河南即陝城也昔周邵分伯以此城爲東西之別東城即虢邑之上陽也虢仲之所都爲南虢三虢此其一焉其大城中有小城故焦國也武王以封神農之後於此王莽更名黃耆矣戴延之云城南倚山原北臨黃河縣水百餘仞臨之者咸悚惕焉西北帶河水涌起方數十丈有物居水中父老云銅翁仲所投處又云石虎載經於此沈沒二物並存水所以涌所未詳也或云翁仲頭髻常出水之漲減恒與水齊晉軍當至髻不復出今唯見水異耳嗟嗟有聲聲聞數里按秦始皇二十一年長狄十二見於臨洮長五丈餘以爲善祥鑄金人十二以象之各重二十四萬斤坐之

宮門之前謂之金狄皆銘其胸云皇帝二十六年初
兼天下以為郡縣正法律同度量大人來見臨洮身
長五丈足六尺李斯書也故衛恒敘篆曰秦之李斯
號為工篆諸山及銅人銘皆斯書也漢自阿房徙之
未央前俗謂之翁仲矣地皇二年王莽夢銅人泣惡
之念銅人銘有皇帝初兼天下文使尚方工鑄滅所
夢銅人膺文後董卓毀其九為錢其在者三魏明帝
欲徙之洛陽重不可勝至霸水西停之漢晉春秋曰
或言金狄泣故留之石虎取置鄴宮苻堅又徙之長
安毀二為錢其一未至而苻堅亂百姓推置陝北河
中於是金狄滅除一作余以為鴻河巨瀆故應不為細

梗蹟湍長津碩浪無宜以微物屯流斯水之所以濤
波者蓋史記所云魏文侯二十六年虢山崩壅河所
致耳獻帝東遷自夕潛渡墜坑爭舟舟指可掬亦是
處矣

又東過大陽縣南

交澗水出吳山東南流入河河水又東路澗水亦出

吳山東逕大陽城西南流注

疑有脫落

水入於河

河水又東逕大陽縣故城南

竹書紀年曰晉獻公十有九年獻公會虞師伐虢滅

下陽虢公醜奔衛獻公命瑕父呂甥邑於虢都地理

志曰北虢也有天子廟王莽更名勤田應劭地理風

俗記城南大河之陽也

河水又東沙澗水注之

北出虞山東南逕傅巖歷傅說隱室前俗名之爲聖人窟孔安國傳傅說隱於虞虢之間即此處也傅巖東北十餘里即巔軫阪也春秋左傳所謂入自巔軫者也有東西絕澗左右幽空窮澗地壑中則築以成道指南北之路謂之爲軫橋也傅說傭隱止息於此高宗求夢得之是矣橋之東北有虞原上道東有虞城堯妻舜以嬪於虞者也周武王以封太伯弟虞仲於此是爲虞公太原地記所謂北虞也城東有山世謂之五冢冢冢上有虞公廟春秋穀梁傳曰晉獻公

將伐虢荀息曰君何不以屈產之乘垂棘之璧假道於虞公曰此晉國之寶也曰是取中府置外府也公從之及取虢滅虞乃牽馬操璧璧則猶故馬齒長矣即宮之奇所以謂虞虢其猶輔車相依唇亡則齒寒虢亡虞亦亡矣其城北對長阪二十許里謂之虞阪戴延之曰自上及下七山相重戰國策曰昔騏驥駕鹽車上於虞阪遷延負轅而不能進此蓋其困處也橋水東北山谿中有小水西南流沙澗亂流逕大陽城東河北郡治也澗水南流逕注於河河水又東南左右合積石土柱二谿並北發大陽之山南流入於河是山也亦通謂之為薄山矣故穆天子傳曰天子

自鹽

舊本作臨

已丑南登於薄寘軫之陞乃宿於虞是也

又東過砥柱間

砥柱山名也昔禹治洪水山陵當水者鑿之故破山以通河河水分流包山而過山見水中若柱然故曰砥柱也三穿既決水流疎分指狀表目亦謂之三門矣山在虢城東北大陽城東也搜神記稱齊景公渡於江沈之河鼃銜左驂沒之衆皆惕古治子於是拔劔從之哀行五里逆行三里至於砥柱之下乃鼃也左手持鼃頭右手挾左驂燕躍鵠踊而出仰天大呼水為逆流三百步觀者皆以為河伯也亦或作江沅字者也若因地而為名則宜在蜀及長沙按春秋此

二土竝景公之所不至古冶子亦無因而騁其勇矣劉
向敘晏子春秋稱古冶子曰吾嘗濟於河龜銜左驂
以入砥柱之流當是時也從而殺之視之乃龜也不
言江沅矣又考史遷記云景公十二年公見晉平公
十八年復見晉昭公旌軒所指路直斯津從龜砥柱
事或在茲又云觀者以為河伯賢於江沅之證河伯
本非江神又河可知也

河之右則嶠水注之

出河南盤嶠山西北流水上有梁俗謂之鴨橋也歷
澗水東北流與石嶠水合水出石嶠山山有二陵南
陵夏后臯之墓也北陵文王所避風雨矣言山徑委

溪峰阜交蔭故可以避風雨也秦將襲鄭蹇叔致諫而公辭焉蹇叔哭子曰吾見其出不見其入晉人禦師必於峭矣余收爾骨焉孟明果覆秦師於此峭水又北左右合西水亂流注於河

河水又東千峭之水注焉

水南導於千峭之山其水北流纏絡二道漢建安中曹公西討巴漢惡南路之嶮故更開北道自後行旅率多從之今山側附路有石銘云晉太康三年弘農太守梁抑修復舊道太峭以東西峭以西明非一峭也西有二石又南五六十步臨谿有恬漠先生翼神碑蓋隱斯山也其水北流注於河河水翼岸夾山巍

峰岐舉羣山疊秀重嶺干霄鄭玄按地說河水東流
貫砥柱觸闕流今世所謂砥柱者蓋乃闕流也砥柱
當在西河未詳也余按鄭玄所說非是西河當無山
以礙之自砥柱以下五戶已上其間一百二十里河
水竦石桀出勢連襄陸蓋亦禹鑿以通河疑此闕流
也其山雖闕尚梗湍流激石雲洄濼波怒溢合有一
十九灘水流迅急勢同三峽破害舟船自古所患漢
鴻嘉四年楊焉言從河上下患砥柱隘可鑿廣之上
乃令焉鑿之裁沒水中不能復去而令水益湍怒害
甚平日魏景初二年二月帝遣都督沙兵一作沙丘部監
運諫議大夫寇茲帥脫工字五千人歲常修治平河岨

晉泰始三年五月武帝遣監運大中大夫趙國都匠
中郎將河東樂世帥衆五千餘人修治河灘事見五
戶祠銘雖世代加功水流湍湊濤波尚屯及其蘭舟
是次鮮不踟躕難濟故有衆峽諸灘之言五戶灘名
也有神祠通謂之五戶將軍亦不知所以也

又東過平陰縣北又東至鄧清水從西北來注之

清水出清廉山之西嶺世亦謂清營山其水東南流
出峽峽左有城蓋古關防也清水歷其南東流逕臯
落城北服虔曰赤翟之都也世謂之倚亳城蓋讀聲
近傳因失實也春秋左傳所謂晉侯使太子申生伐
東山臯落氏者也與倚亳川水合水出北山礦谷東

南流注於清清水又東逕清廉城南又東南流又會

南谿谿水出南山而東注清水又東合棗澗水水出

左人嶺下南流俗謂之扶蘇水又南歷姦苗北馬頭

山赤疑作亦曰宋本無白水原西南逕垣縣故城北史

記魏武侯二年城安邑至垣即是縣也其水西南入

清水色白濁初會清流流注宋本無流乃有玄素之

異也清水又東南逕陽壺城東即垣縣之壺城東即

垣縣之壺丘亭晉遷宋五大夫所居也清水又東南

流注於河

河水又東與教水合

出垣縣北教山南逕輔山高三十許里上有泉不測

其溪山頂周員五六里少草木山海經曰孟門東南有平山水出於其上潛於其下又是王屋之次疑即平山也其水南流歷鼓鍾上峽縣洪五丈飛流注壑夾岬溪高壁立直上經崖秀舉百有餘丈峰次青松巖縣賴石於中歷落有翠柏生焉丹青綺分望若圖繡矣水廣一十許步南流歷鼓鍾川分為二澗一澗西北出一百六十許里山岫迴咀纔通馬步今聞喜縣東北谷口猶有乾河里故溝存焉今無復有水一水歷冶官西世人謂之鼓鍾城城之左右猶有遺銅及銅錢也城西阜下有泉西流注澗與獮水合伏入石下南至下峽山海經曰鼓鍾之山帝臺之所以

觴百神即是山也其水重源雙發南至西馬頭山東

載

疑作

坡下又伏流南十餘里復出又謂之伏流水

南入於河山海經曰敎山敎水出焉又南

今山海經作西流

注於河是水冬乾夏流實惟乾河也今世人猶謂之

爲乾澗矣

河水又與畛水合

水出新安縣青要山今謂之疆

一作疆

山山海經曰河

長澗水北流入於河山海經曰青要之山畛水出焉

即是水也

此處錯誤當云山海經曰青要之山

河水

又東正回之水入焉水出騏山疆山東阜也東流俗

謂之疆川水與石等瓜川合出西北石澗中東南流

注於疆水疆水又東逕疆冶鐵官東東北流注於河

河水又東合庸庸之水

山海經作瀟瀟

水出河南垣縣宜蘇山俗謂之長泉水山海經曰水多黃貝伊洛門也其水北流分爲二水一水北入河一水又東北流注於河

河水又東逕平陰縣北

地理風俗記曰河南平陰縣故晉陰地陰戎之所居又曰在平城之南故曰平陰也三老董公說高祖處陸機所謂皤皤董叟謨我平陰者也魏文帝改曰河陰矣

河水西會溱水

一作右會

水出垣縣王屋西山漈谿夾山東南流逕故城東即
漈關也漢光武建武二年遣司空王梁北守漈關天
井關擊赤眉別校皆降之獻帝自陝北渡安邑東出
漈關即是關也漈水西屈逕關城南歷軹關南逕苗
亭西亭故周之苗邑也又東流注於河經書清水非
也是乃漈水耳